

PONTŠO E KHOLOHALI



Ha re rapeleng.

Ntate ea Maholimong, re a U leboha, bosiueng bona, hore U sa le KE TENG E MOHOLO, e seng “ke ne ke le teng” kapa “ke tla ba teng.” U lekhathe la joale, Molimo oa rōna. ‘Me esale Uena maobane, kajeno, le kamehla, Molimo o sa fetoheng. Re a U leboha hobane re fuoe monyetla ona oa ho tseba sena, se senotsoeng ho rona ke Moea o Halalelang. ‘Me O re tiiselitse ‘Musong oa Molimo, le Eëna, ka Letšoao leo A re sietseng lona. Re leboha haholo ka Lona. Re hlohonolofatse, bosiueng bona, ha re ntse re U emetse. Ka Lebitso la Jesu re a rapela. Amen.

Le ka lula fatše.

² Ke tlameha, hore feela ke behe lisakatuku tsena tse ‘maloa lehlakoreng lena mona, feela . . . Re tliil’o rapella bakuli, masiueng a setseng, ha Morena a ratile. Re tliil’o etsa joalo. Le ha ho le joalo, ke boleletse Billy hore o ne a batla a siiloe ke nako, bosiueng bona, ‘me ha a khona ho aba litlankana tsa thapelo, empa leha ho le joalo re ne re nahana hore re ka ‘na ra e etsa ha mohlomong ke ntse ke etsa memela aletare, kapa ho hong, re ka e etsa.

³ Joale bohle re ikutloa hantle? [Phutheho e re, “Amen.”—Mohli.] Ke botle. Ke—ke hlile ke thabetse ho utloa seo.

⁴ Joale, ke lumela ho tsebisitsoe hore lijo tsa hoseng tsa Borakhoebo li hoseng. Kea kholoa hore ba, ke, ba tsebisitse nako, le joalo-joalo. Joale ha re itokisetseng sohle seo Morena a batlang hore re se etse. Re a elelloa hore bona ke bosiu boo ntho efe e ka etsahalang, ka hona re batla ho itokisetsa eona, le ho kena Molaetseng ka potlako. Ka hona, hosane re na le letsatsi le maphathe haholo.

⁵ ‘Me Sontaha, hoseng ha Sontaha, ke kholoa ke tla bua mona ka mora sekolo sa Sontaha, Sontaha hoseng; le Sontaha bosiu. Ka hona, u memeloa likopanong tsena tsohle. Ee, empa haeba u le mosebetsing kae-kae, oo u lokelang ho ba ho ‘ona, hantle, re ne re sa batle hore u fetoe ke seo.

⁶ Ke na le mokete oa lenyalo, ka nako e ‘ngoe, e ka ba hosane kapa ka la hosasane. Sontaha hoseng, e, ke lokela ho nyalisa banyalani ba tabernakeleng ea ka. ‘Me ka hona re lebeletse ho bona sena hape.

⁷ ‘Me joale le re rapelle ha re ntse re leka ho bala karolo e itseng ea Lentsoe la Molimo hona joale, le ho kena ka kotloloho Molaetseng, kapele. Ba ne ba batla hore ke tle pejana ka lebaka la letšoele le emeng. Kahoo re tla bala ho Esaia, khaolo ea 7. Ke batla ho bala, ho qala ka temana ea 10.

Eaba MORENA o bua . . . le Akase a re,

Kopa letšoao ho MORENA Molimo oa hau; le kope, ebang ke botebong kapa holim'a bophahamo.

'Me Akase a re, Nke ke ka kopa, leha e le ho leka Morena.

A re, Utloang lona . . . Oho ntlu ea Davida; Ke ntho e nyenyane ho lōna ho khathatsa batho, empa na le tla khathatsa le Molimo oa ka?

Ka baka leo MORENA ka sebele o tla le fa pontšo; Bonang, moroetsana o tla emola, 'me o tla tsoala mora, 'me ba tla mo re a lebitso la Immanuele.

8 Ha nka rea sena sehlooho, bosiung bona, ho bua ka sona metsotso e 'maloa, holim'a lintlha tse itseng tseo ke li ngotseng thapama ena mona, ke rata ho bua ka . . . ho nka sehlooho sa, *Pontšo E Kholohali*.

9 Le a tseba, lena ke letsatsi le leholo, ntho e 'ngoe le e 'ngoe e kholo. 'Me rea bona hore e—e lehalima le litsenene sebakeng bosiung ba maru, ka sebele se re tiisetse hore leseli le ka hlaha lefifing. Re tseba seo.

10 Molimo o tsebile qetello ho tloha qalong, ka hona O ka khona ho rera tsohle, hore e tle e sebeletse khanyeng ea Hae feela. 'Me hoo ho re fa sebete, ho tseba hore ho sa tsotelehe se tlang kapa se tsamaeang, Molimo o etsa tsohle, tšupanako e otlala hantle ka nako.

11 Ka linako tse ling re a khathala, re a ferekana. Re a potlaka. Re nahana, "Oh, re tlameha ho etsa *sena*, kapa ho etsa *sane*."

12 Empa, hopolang, tšupanako ea Molimo e tla otlala ka nako hantle. Lintho tsena tsohle li tlameha ho ema tjena. Tsohle li tlameha ho etsoa ho latela tsebo ea Hae e kholo, boitsebelopele ba Hae, hobane ka boitsebelopele A ka rera esale pele; e seng ka takatso ea Hae, empa ka tsebo ea Hae. Molimo ha o rere ka takatso ea Hae. Ha O batle hore mang kapa mang a timele, empa ka boitsebelopele ba Hae O tsebile ea tlang ho e amohela le ea sa tl'o e amohela. Ka baka leo A ka etsa tsohle li sebetse ho latela tšupanako ea Hae e kholo e ntseng e tsamaea, hoba O ne a ka bolela qetello ho tloha qalong. 'Me, ka baka leo, O tsebile re tla phela letsatsing lena. O tsebile lena e tla ba letsatsi la rōna. O ne a e-na le merero ea letsatsi lena. O ne a e-na le merero ea letsatsi le leng le le leng. 'Me ha ho le e le 'ngoe ea merero ea Hae e kileng ea hloleha. O lula a le nakong kamehla.

13 'Me sena ke seo re se bitsang mongoaha o moholo. Ntho e 'ngoe le e 'ngoe eo u e bonang matsatsing ana e tlameha ho ba "kholo," ho seng joalo e ke ke ea amohelaha, haeba u se na ntho e kholo, hobane ke mongoaha o moholo. Ba bile le mongoaha oa bona, 'me ba e-na, joale ba na le mongoaha o moholo, ntho e 'ngoe le e 'ngoe eo re e bonang.

¹⁴ U ke ke ua hlola u ea levenkeleng le sekhutlong, ‘me ua fumane boloko bo boholo ba chisi bo robetse joaloka ha u ne u tloaetse. ‘Me—‘me ka mokhoa mehleng, mavenkele a khale a likhutlong, le haeba lijo li ne li le monate haholo, motho e mong le e mong o batla ho ea ‘marakeng oa sejoale-joale, o pholisang moea, o bitsoang suphamakete. Ba tlameha ho ea mono leha ba ka lefella lijo tsa bona ho feta. Ba tlameha ho ea suphamakete. Ke hantle. Hobane o moholo. Le a bona? E mong le e mong o batla ntho e kholo.

¹⁵ ‘Me, kajeno, u ke ke ua nka koloi e tloaelehleng. Moetso oa khale oa T o tla chaisoa, ha u le seterateng hona joale. Ba na le koloi e kholohali. Ford e lokela ho li etsa li le kholohali. Chevy e lokela ho li etsa li le kholohali. Ba bang kaofela, ba lebelletse ho lula peisong, ba tlameha ho li etsa li be kholo. Ntho e ‘ngoe le e ‘ngoe ke e kholo, e kholo, e kholo.

¹⁶ Ka mora nakoana, re fihla mongoaheng oa moea. Joale ba ne ba nkile sefofane se kothometsoang. Ebe, ntho ea pele le a tseba, ba fihla ka jete. ‘Me joale ba na le jete e kholo. Le a bona, e tlameha ho ba kholohali. Haeba ho se joalo, ha se—ha e nakong. Ntho e ‘ngoe le e ‘ngoe mongoaheng ona e tlameha ho ba kholohali.

¹⁷ Re ne re tloaetse ho tsamaea mebilakholo ea khale, joale ke mebilakholo. E tlameha e be litselana tse ‘ne kapa tse hlano tse eang nqa e le ‘ngoe, le tse ‘ne kapa tse hlano tse tlang ka tsela e ‘ngoe, ho seng joalo o tla hatikeloa. Ua bona? U tlameha ho ba le eona, hoba ona ke mongoaha o moholo, ke nako e kholo. Ntho e ‘ngoe le e ‘ngoe e boholong.

¹⁸ Re bile re nahana hore re na le batho ba baholo, kapa batho ba bang ba nahanang hore ba phahame, ‘me ba leka ho itšoara joalo, le ha ho le joalo. Morabe o phahameng, morabe o mong o batlang ho busa o mong.

¹⁹ Likereke tse kholohali, mekhatlo e meholo ea malumeli, ntho e ‘ngoe le e ‘ngoe ke boholo. “Haeba e se kholo, be, ha e joalo.”

²⁰ Ke nahana hore le basali ba se ba apara haholohali, mehleng ena ea sejoale-joale. Lieta tsa khale, li ne li noketsoe letlalo ka hare, u li reka ka lidolara tse ka bang tharo ka para, mofuta o motle ka ho fetisisa, li le letlalo le fetang la lipara tse leshome le metso e ‘meli tsa kajeno, tseo u li lefellang lidolara tse mashome a mabeli a metso e mehlano. Empa e tlameha ho ba mofuta o moholohali, ua tseba, lirethe tse ka bang *kaalo*, ‘me ho se menoana ea maoto, empa ke tse kholohali. Ua bona, ke eona ntho eo. U tlameha ho bopelloa methinya meholohali ho tsamaea ka eona, ua bona. Ke ‘nete. Ntho e ‘ngoe le e ‘ngoe e a hlanya, ho ‘na, le a bona. Empa ke e—ke mongoaha o moholohali. Ke nako e kholohali.

²¹ Matšoao ana kaofela ke—ke matšoao a lefifi la moea. Lintho tsena tsohle tseo re li bonang li etsahala linthong tsena tse

kholohali, kholohali, kholohali, hola feela re ka tseba! Re potlakile, re tlameha ho fihla mono, 'me re etsang ha re fihla mono? Ka tloaelo, e le ho tsamaea ho tloha mosebetsing ho ea hae, 'me le bana ba ne ba tlameha ho tsamaea ho ea sekolong, 'me joale ba na le bese e tlang monyako ho ba thonaka le ho ba felehetsa ho ea sekolong le ho tsoa sekolong, ebe u lefa halofo ea milione ea lidolara bakeng sa phaposi ea boikhathollo, ho ba fa boikoetliso bo bonyane, ho seng joalo ba a shoa. Be, ba ne ba tloetse ho tsamaea ka maoto ho ea sekolong. Mongaoaha o moholohali! Hantle, na ha ho joalo? Le likereke li tlameha ho ba fumana, ha li na tšebetso e lekaneng hara tsona, ba lokela ho fumana e—e—e phaposi eo bohle ba ka bapallang ho eona le ho qhomela holimo-le-tlase. Ba kile ba etsisoa ke Moea, empa joale ba tlameha ho tsoela mono, e batla e le nako ea tonana. Lea bona, tsohle li lebisa lefifing la moea, letsatsi le leholo leo re phelang ho lona.

²² Le a tseba, batho ba Hae, batho ba Molimo ba Bible, esale ba lemositsoe, ke Molimo, ho shebella lipontšo tsa mehla. Jesu, mehleng ea Hae lefatšeng, O boleletse Bafarisi ba mehleng ea Hae, O itse, “Lona Bafarisi ba lifofu.” A re, “Le tsoela kantle mantsiboea ‘me le sheba le bone maholimo a le hlakile ebile a le khubelu,” ho re, “‘Hosane,’ le tla re, ‘e tla ba letsatsi le hlakileng.’” Me A re, “Le ka tsoa ‘me a sithabetse, ba halefile, ke hona, ‘Hosane etlaba boemo ba leholimo bo bobē.’” A re, “Le ka lemoha maemo a leholimo, empa pontšo ea mehla ha le e lemohe.” Ho re, “Hoja le Ntsebile, le ka be le tsebile letsatsi la Ka. Hoja le tsebile Moshe,” O itse, “le ka be le Ntsebile, hoba Moshe o ngotse ka ‘Na.’”

²³ Ka mantsoe a mang, joaloka ha ke boletse, ba ne ba tla tseba hore Lengolo se neng se lokela ho phethahala ka lona letsatsi leo, se ne se ntse se phethahala, empa ba ne ba sa tsebe. Ba ne ba tsepamisitse mahlo a bona—a bona meetlong ea bona, le linthong, ho fihlela ba sitoa ho bona Lengolo ka bolona le ntse le pbuthuloha ka pel’a bona.

²⁴ Nka tšoantša mongoaha ‘ona le oo. Hore esita le hara—hara batho ba batle, ka nako tse ling, ba sitoa ho e bona. Ba tsamaea feela, ‘me, ka botšepahi, ke—ke . . . E ne e tla ‘nyahamisa holane ke sa tseba hore Jesu o buile seo A se buileng ka taba eona, hore, “Ha ho motho ea ka tlang haese hae Ntate oa Ka a mo hula, ‘me bohle bao Ntate a ‘Neileng bona ba tla tla.’” Ba ke ke ba E bona le ka mohla. A re, “Esaia o buile hantle ka lena, ho re, ‘Le na le mahlo ‘me ha le bone, litsebe ‘me ha le utloe.’” Ke pono e haulang, empa ba ne ba le joalo.

²⁵ ‘Me joale re fumana e batla e itšoanela le ntho e leng teng kajeno, holima re tseba hoba re phela nakong eo lefifi le leholo le fihlang le koahela lefatše le batho. ‘Me re fumana, katleho ena eohle ea sejoale, ea mongoaha o moholohali, le joalo-joalo, eo re phelang ho eona, ke pontšo ea lefifi le leholo le ‘musong oa moea.

Re mongoaheng oa kereke ea Laodisea, moo ba leng fofa feela. Ba ka ea kerekeng, 'me batho ba etsa joalo, 'me—'me eka ba na le cheseho ho ea kerekeng; empa ho tseba ho hong ka Moea, nako eo ba phelang ho eona, ba bang ba bona ba foufaletse lintho tseo kamoo ba ka khonang. Ho sa tsotelehe seo Molimo o ka se etsang, le kamoo e ka khohisoang ka Lentsoe la Hae, le joale ha ba khone ho e bona. Ke a ipotsa haeba e se ntho e kang eo A e buileng, "Re na le mahlo, empa ha re bone." Re lokela ho qamaka le ho bona lintho tsena tsohle tse etsahalang ke ponts'o ea hore bofelo bo haufi, hobane tsena ke lintho tse neng li boleloe esale pele hore li tla hlaha nakong eo.

26 Ke batla le lemohe tsoelliso e sa fetoheng ea Lentsoe la Molimo le mesebetsi ea Hae. Lea bona, ha A fetole lenaneo la Hae—la Hae le ka mohla. Ha A fetole litsela tsa Hae le ka mohla. Ka ho phethahala feela, Lengolo le tsoella ka phetheheho. Ntho e 'ngoe le e 'ngoe eo Molimo o e etsang e tatelanong le seo A se entseng. Lea bona? 'Me seo A se entseng pele, ke hore, O tla se etsa khetlo labobeli ka tsela e tsoanang.

27 'Me ho le pakela eona feela, O ralile melao lefatšeng. 'Me esale A fa batho ba Hae pontšo pele ketsahalo e hlaha. Joale esale A e etsa. 'Me O tla e etsa kamehla, hobane Ke Molimo o sa fetoheng. "Ke Molimo," A re, "ha Ke fetohle." Kamoo A ralang lenaneo la Hae tšimolohong, ho joalo mongoaheng o mong le o mong. Ha A le fetole le ka mohla.

28 Mohla A ne a thea lefatše ho phikoloha holim'a motheo oa lihora tse mashome a mabeli a metso e mene; re ka sibolla linako tse bolokang letsatsi, le mefuta eohle ea linako, empa seo ha se ke se fetola mopotoloho oa lefatše. Le likoloha ka botlalo lihoreng tse ling le tse ling tse mashome a mabeli a metso e mene, ho potoloha. Ha le fetole lihla tsa selemo, Molimo o na le selemo, lehlabula, le mariha, hantle feela joaloka mehleng. O e sebelitse joalo pele, O e sebetse joalo nako le nako. Tsoelopele ea melao ea Hae, le ea Lentsoe la Hae, le ea mesebetsi ea Hae, kamoo tsohle li kopanang ka phethahalo kateng!

29 Ka baka leo, ha re ka sheba se neng se le teng, re ka tseba se leng teng le se tlang ho ba teng. U ka theha mehopolo ea hau holim'a seo, hoba Lengolo le re, "Ke oa maobane, kajeno, le kamehla."

30 Re lemoha pele sehla sa selemo se fihla. Shebang e meng ea melao ea Hae. "Ha le bona lifate li hlhisa mahlaku," O itse, "le a tseba lehlabula le haufi." Sehla sa selemo ke pontšo ea selelekela sa lehlabula le tlang. Oo ke molao. E etsahala joalo kamehla. Ha le fumane lehlabula, ebe ha mariha a fihla mahlaku a qala a mela. Che, u fumana mahlaku pele, hoba ke selelekela sa melao ea Hae ea tlhaho, hore sehla seo se a fihla. Ha e hlolehe le ka mohla. Ha u bona lifate li qala li eba bonolo, mathokong a

lekhapetla, 'me menoko e qala e thunya, le a tseba ke pontšo ea hore nako ea selemo e fihlile, e a kena.

³¹ Ha u bona hoetla ea selemo pele re ba fumana serame kapa eng, le mahlaku a foforeha lifateng, u re, "Be, hoetla e hauifi." U tseba joang? Hobane mahlaku a foforeha. Tlhaho e itokisetsa eona. Selemo ka seng e a itšoanela.

³² O boetse o re fa pontšo phetohong ea maemo a leholimo. Le ka tsoa la sheba, joaloka ha A boletse, "Le bona leholimō le lefubelu 'me le sithabetse, hosane le tla ba lebe." 'Me ha A e fetole le ka mohla. Kamehla O a re lemosa. U ka nka, ua utloa moea o qala o ba mongobo, nako pele ho sefefe, 'me le shebe ha tlhaho eohle e bapa le ntho eo. Ke pontšo.

³³ Joaloka ha ke 'nile ka bolela, "Hola Bibe e le sieo, ke ne ke tla tseba hore Molimo o teng, ho sheba feela kamoo tlhaho e sebetsang kateng." Ke melao ea Hae, kaofela e hokahane. Lentsoe la Hae le ntse le tsoelletse; Le ke ke la hlaleha. Lipontšo tsa hae li tsamaisana le nako. Lipontšo li khema le Bibe hantle. Lipontšo li khoeling hantle. Lipontšo li sebakeng hantle. Lipontšo li holima lefatše hantle. Lipontšo li ka hara kereke hantle. 'Me re ka sheba ka hara kereke, kajeno, 'me ra bona hore pontšo e lokile hore A tle.

³⁴ Ho tea mohlala, kamoo e sebetsang holima tlhaho. Nkile ka fihla holimo Northwoods, moo ke neng ke tsoma, le pele re tsoaroa ke—ke sefuba; matata a tsoa Louisiana, a nyolohela mono a haha lihlaha tsa 'ona, a qhotsa bana ba ona. Ere feela moea o pholileng oa pele o hlahe holim'a leralla leo ha lehloa le koahela lithaba, 'me matatanyana ao a phahama mono, 'me a eso tlohe letšeng leo le ka mohla, 'me a khutlele Louisiana ka ho otloloha kamoo a ka khonang. Ke tlhaho, bonang, melao ea tlhaho. A e etsa selemo le selemo. 'Me hape, ntho ea pele le a tseba, tlase mona Louisana letsatsi le chesang la qala le theoha, tlase mona Louisana, shebang ha a kopana, a boela a phaphamala, 'me a khutlela lithabeng hape.

³⁵ Shebellang mahlaku mona Texas, moo a mangata a 'ona a eang teng. Ke bone mohla re tlamehang ho emisa koloi, tseleng. Ha a khathatsoe ke mang kapa mang. A nahana ka ho falla. A tsoere tsoeletso. Kaofela ha ona, ha le eso utloe lerata le joalo. Ho hobe ho feta Mapentekosta, mohla ba kopanang. Ua bona? Ke eng? Ke melao ea tlhaho. Lea bona, bona, selemo se seng le se seng a bokana 'moho, ebe a khobokana, 'me a tlohe. Matata ao ha a tloha, le makhantsi a tloha Texas, lehlabula le atametse. Ke hantle.

³⁶ 'Me ha a tloha British Columbia e ka leboea, mariha a tseleng; ho utloa makhantsi ao ha a feta, a lla kamoo a tloaetseng, a habile boroa. Nka a mamela le ho lla, hoba ke bona Molimo a a tataisa. A tataisoa ke'ng moeeng o se nang tsela, athe ke sebata se hlohang kelello? Hoo ho etsoa ke'ng? Ha ke le utloa le theoha, le

hooa, moetapele eane kantle, a haola tseleng ea hae; mohlomong ha le e-s'o fihle Louisiana pele, empa le tla fihla. Se tšoenyehe. Le ruile se seng ka ho lona le 'molellang moo le eang teng. Lea fofa. Le etella mohlape pele. Letšoele lohle la ona lea tla. Mohlomong ha a e-s'o fihle mona pele. Empa le tseba hantle-ntle moo masimo a raese a—a jereng raese a leng teng, hobane le na le ntho e le tsamaisang. Ke tlhaho ea lona.

³⁷ Ebe nakong ea selemo, mohlaha ho leng monate ho futhumetse mona mariha, le tla khutlela hape morao. Hobane'ng? Ke tlhaho e iponahatsang. Ke melao ea Molimo.

³⁸ Ka mehla lipontšo tsa Hae li lelekela liketsahalo tsa Hae, joaloka ha hoo ho etsa. Ha u bona likhantsi li tsamaea, ho bona menoko e thunya, ho bona mahlaku a foforeha, bonang, ke khemisano ea tlhaho e nyallana. Molao oa Molimo oa tlhaho o a lohana, 'me O lelekela liketsahalo tsa Hae. Esale ho le joalo, ha eso hlolehe, 'me e ke ke ea hloleha le ka mohla.

³⁹ Hola feela re ka sala kutloano ea Lentsoe la Molimo morao, re ke ke ra hloleha, le rona. Ha re sa nke e—e mokhoa woa sejoale-joale le—le ho leka ho kenya ntho e 'ngoe ho eona, empa latela khemisano ea eona ea mehla, sheba se etsahalang. Re tla ea hae ka kotloloho, hape, le leng la matsatsi ana. E lula e etsa joalo kamehla, 'me ha e hlolehe le ka mohla.

⁴⁰ Baporofeta ke pontšo ea sehlooho. Pontšo ea sehlooho ea Molimo ke moporofeta. Joale ke tla bua metsotso e 'maloa ka taba eo. Bao ke Lentsoe la Hae le bonahalitsoeng la mongoaha oo, 'me ke ka lebaka leo moporofeta e leng pontšo ea sehlooho ea Molimo kamehla. Ha A eso romele kahlolo holima lefatše pele A romela moporofeta. Bonang feela, 'me le batlisisa Mangolo. Moporofeta ke pontšo ea sehlooho ea Molimo, bathong ba Hae, hore O rometse motho enoa, motho enoa ea itseng, joaloka Nohe, joaloka Moshe, le—le Elia le baporofeta. O ba romela ho bonahatsa Lentsoe la mongoaha oo, ho lemosa batho ba Hae.

⁴¹ Joaloka ha A romela serame holima matata, ho a lelekela Leboea ho ea Boroa; ho khemisana tlhahong, ho khemisana Lentsoeng, ha A hlolehe ho e etsa. Haeba ho hlokoa serame ho a fallisa, selemong se tlang ho tla hlokoa serame ho a fallisa. Haeba ho hlokoa leholimo le chesang ho a fallisa, selemo se latelang ho hlokoa leholimo le chesang ho a fallisa.

⁴² 'Me ha Molimo o itokisetša ho romela kahlolo, pele A romela kahlolo, O romela moporofeta 'me o bonahatsa Lentsoe la Hae, ho netefatsa Lentsoe la mongoaha oo. O e entse mengoaheng e meng eohle. O tšepisitše ho e etsa mengoaheng ona. 'Me O tla e etsa mengoaheng ona, ho sa tsotelehe seo batho ba se buang ka eona. O tla e etsa, leha ho le joalo, hoba A ke ke a roba khemisano ea Hae. Ke kamoo A e rerileng kateng, O e sebetsa ka ho tšoana kamehla. Ha A hlolehe ho e sebetsa joaloka ha A entse lekhetlo la pele.

⁴³ Joaloka Johanne Mokolobetsi, joale, re ne re qetile lilemo tse makholo a mane, ho qala ka Malakia ho isa ho Johanne, pontšo e ne e le sieo, moporofeta oa Testamente ea Khale, nako e ka bang kaalo (mohlomong nako ea baahloli) eo ho kileng ha hlokoa moporofeta. Molato e ne e le ofe, hobane'ng ba sa fumana moporofeta mehleng eo? Lentsoe le ne le sa beheloa nako eo. Ba ne ba loketse ho ema ho fihlela nako e fihla. Ba ne ba loketse ho ema. Boporofeta bo ho Malakia bo boletse, e ne e le Malakia 3, "Bonang, Ke roma morumooa oa Ka pela sefahleho sa Ka, o tla hleka tsela ea Ka pela Ka," Malakia 3:1. Joale, boo e ne e le boporofeta ba Malakia ba ho tla ha Morena Jesu. Ho se letho le lokelang ho etsahala lipakeng tsa nako eo, kahoo kereke ea ba botsoa 'me ea tsoelapele ka tsela ea eona, ho fihlela nako ea tšepiso e atamela.

⁴⁴ 'Me eare ha nako ea tšepiso e atamela, Molimo, ka mokhoa o mohlolo, oa tlisa Johanne lefatšeng. E ne e le monna ea tsoetsoeng ke mosali, ehlile, 'me re tseba 'maè o ne a bitsoa "Elisabetha" 'me ntataè a bitsoa "Zakaria." E ne e le batho ba lokileng. 'Me ntatae e ne e le moprista. E ne e le tloaelo ea bashanyana ba letsatsi leo ho sala e—e mosebetsi oa ntata bona morao, empa re rutoa hore Johanne, mohla a leng lilemo tse robong, ka mora lefu la ntataè, a kena lefeelleng a lula a le mong ho fihlela a le mashome a mararo.

⁴⁵ Le a bona, hola a sokolohela ho seo ntatae a neng a se ruile, ba ka be ba mo ferekantse hakana hofihlela a sa tl'o tseba ho qoholla Messia eo ha A fihla. A ka be a sa Mo tseba. Empa a lula lefeelleng. Holane a kena seminari, ka monahano oa ntatae, e mong le e mong oa bona a ka be a itse, "Joale, Johanne, re utloisisa hoba u tla tseba Messia mohla A tlang. Joale, na ha u hopole Moena *Sekete-kete* mona a khohlelana le seemo hantle feela? Ho ka thoe'ng ka Kaifase, moprista oa rōna e moholo kajeno, na ha u nahane hore ke monna ea babatsehlang?" Sohle seo kelellong ea hae e halalelang, a ka be a sa khona ho e nahana hantle.

⁴⁶ A tsoela lefeelleng, 'me a ema! Mosebetsi oa hae o ne o phahame haholo bakeng sa thuto. Mosebetsi oa hae o ne o le moholo haholo bakeng sa thutabomolimo. O ne a lokela ho tsebahatsa Messia. 'Me a lula lefeelleng.

⁴⁷ Shebang thero ea hae. Thero ea hae e ne e se makala a—a thuto ea bolumeli ea letsatsi leo. Ua hlokomela e ne e se eona. O buile ka'ng? Selepe sefateng, linoha. Le a bona, ke phetho seo a se tsebileng. O holetse lefeelleng. Ke sona seo a se tsebileng: linoha, lifate, lilepe, le tse ling. 'Me molaetsa oa hae o ne o theiloe holim'a, tlhaho. Mohla a reng, "Lona malinyane a marabe, le tšositsoe ke mang ho balehela bohale bo tlang? Le se ke la nahana la re Abraham a ke ntata lona, hobane Molimo o ka tsoetsa Abraham a bana ka majoe ana. Hape selepe se beiloe motsong oa sefate; 'me sefate ka seng se sa beheng tholoana e monate se a

rengoa, le ho lahleloa mollong.” Ho re, “Ke hlile ke le kolobetsa ka metsi pakong. Empa e Mong o a tla ka morao ho ‘na Eo ke sa lokelang ho jara lieta tsa hae, O tla le kolobetsa ka Moea o Halalelang, le mollo. Seoloso sa Hae se letsohong la Hae; O tla fiela liotlo tsa hae ruri, mooko ona o chesoe mollong o sa timeng, le ho isa koro molikong.” Amen.

⁴⁸ Monna ke eo, moporofeta ruri. A na le pontšo eo a neng a lokela ho e sheba. ‘Me eitse ha a bona Messia, ke ha a khotsoe hore O tla fihla letsatsing la hae, o ne a tiile haholo. Oh, hoja Kereke e ne e ka fumana maemo a Eona a matle, hola E ka tseba ho kemo ea Eona horeng! Hoba, ho latela Lengolo, ke eëna ea neng a tla tsebahatsa Messia, ‘me a tseba hoba O lokela ho ba lefatšeng matsatsing a boporofeta ba hae. Ka baka leo A lika-lika haufi le moo a neng a rera, hoo a bileng a re, “E Mong o eme hara lona joale, eo le sa mo tsebeng, e Mong hara lona hona joale.” O e tsebile. O ne a le teng mono. Hora e ne e atametse. O e tsebile.

⁴⁹ Ka tsatsi le leng a sheba, ho theohang Leholimong. . . ‘Me a bona e—e Leseli, eka leeba le theohang Leholimong. ‘Me Eo Le lutseng holim’a hae, a re, “Ke pakile hore enoa ke Mora oa Molimo.” O Le bone. “Hoba Eo, lefelleng, ea mpoleletseng, ‘Eo u tla bona Moea o theohela o lula holim’a Hae, ke Eëna ea tla kolobetsa ka Moea o Halalelang le Mollo.”

⁵⁰ E ne e le monna ea romiloeng ke Molimo, a koetlisitsoe ke Molimo, ‘me a sebeletsa Molimo, ho fihlela eëna le Molimo ba fetoha. . . E ne e le moporofeta, ‘me Lentsoe le tlile ho eëna, joaloka ha ke buile bosiu bo bong, metsing. E ne e le Lentsoe la. . . la Molimo, la nako ea boporofeta ba Malakia. Malakia o boletse ho tla ba le motho ea joalo, ‘me Johanne a fihla temeng, moporofeta, ho phethahatsa Lentsoe la Morena, la letsatsi leo. Ka hona, eona, e ne e le pontšo ho Iseraele, hola feela ba tsebile pontšo.

⁵¹ Esita le barutuo a ba re, “Hobaneng bangoli ba re moporofeta e ka khona, Elia o tsoanetse ho tla pele?”

A re, “O se a tlile, ‘me ha le a ka la mo tseba.”

⁵² Molimo o e sebetsa ka tsela e nyatsehang, ho nka peo eo e khethiloeng feela, ho fihlela ba bang ba e bone ho hang. Ke ‘nete.

⁵³ Banna ba bohlale ba bakae Babilona, ba ithutileng linaleli, mohla banna bana ba bararo ba bohlale ba tsebileng hoo mohlomong oo, leha, tsamaisong eo ea letsatsi le mahlahana, mohla linaleli tse tharo tseo li neng li kolohana, e ne e le pontšo ea hobane Messia o lefatšeng? Ba e tsebile. Ba e lumetse. ‘Me ke bona ba boneng linaleli. Ba bang ha ba ka ba li bona. Li ne li kene senkhomeng sa tsona se nepahetseng, empa ba li bone kamoo Molimo o li hlakisitseng ho bona.

⁵⁴ Le Evangeli e joalo kajeno. E ka bonoa feela kamoo Molimo a u hlakisetsang eona. ‘Me haeba e hlahisoa ho uena kathoko ho

khemisano ea Bibele, e tla be e se Molimo ea u bolellang eona. Amen. U ke ke ua buisa Bibele leshano. Ke Lentsoe la Molimo le sa foseng. ‘Me e tlameha ho nyallana le khemisano ea Hae, Lentsoe la Hae lohle. E ke ke ea bolela tulo e le ‘ngoe *ena*, le ntho *ena* esele; le ho etsa *sena* hape, ho otlala, ho hasanya. O otlala pheo nako le nako, Lentsoe le etsa joalo, ka hona u loketse ho e etsa ka khemisano ea Lentsoe lohle. Ka baka leo, tsela ea Hae esale e le joalo, Lentsoeng, ho romela moporofeta pele ho nako eo, pele A netefatsa Lentsoe la Hae.

⁵⁵ Joale mona re ka bua, motsotso feela, seo *moporofeta* e leng sona. Joale ka polelo ea Senyesemane, ho latela polelo ea Senyesemane ea lona, le bolela “moreri.” Be, tseo ke lipolelo tsa Senyesemane. Empa ka polelo ea Seheberu, e bitsoa “seboni.”

⁵⁶ ‘Me seboni e ne e le sona se nang le tlhaloso ea Lentsoe le ngoliloeng, ‘me se bone lintho tse tlang ho tla pele. ‘Me eitse ha a bua ka lintho tse tlang ho tla, le ho paka hore e ne e le seboni, eaba o a tsebile. Ba mo tsebile a tsoere tlhaloso e nepahetseng ea Lengolo, hobane Molimo, ka eena, o bonahalitse Lengolo le ngoliloeng la letsatsi leo. Amen. Le se ke la ba botsoa. Tsohang! E ne e le boitsebiso bo hlakileng, seboni, motho ea lehang le motho ea bolelang pele. ‘Me mokhoa o le mong oo ba tsebileng hoba o ne a fumana tlhaloso e nepahetseng ea Lengolo, hobane seo a se boleletseng se etsahetse. Eaba ba tseba hore o bitsitsoe ke Molimo, Molimo o itsalo. ‘Me eaba ba hlokomela hore ehlile e ne e khutla hape e tsoelapele ka Lentsoe la letsatsi leo.

⁵⁷ Jesu o itse, “Batlisisang Mangolo!” Mohla ba boneng hoba O khonne ho lemoha mehopolo e kelellong ea bona, ‘me ba Mo bitsa Belsebule, O itse, “Batlisisang Mangolo, ke ‘Ona A pakang ka ‘Na.” Tsoelliso ea Mangolo e nyallana ka ho phethahala le pontšo ea nako! E ne e le pontšo ea Molimo ea nako. E ne e le ponahatso ea Lentsoe le ngoliloeng, ‘me hape a ka lepa se tla etsahala, ‘me ba ke ke ba e latola. E ne e le pontšo e kholo ea letsatsi leo. Ruri e ne e le eona.

⁵⁸ Hlokomelang khemisano ea Lentsoe la Hae le sa fetoheng, le Moea o Halalelang. Jesu o itse, “Mohla Moea o Halalelang o theohelang holim’a lona, O tla le hopotsa, kapa ho senola lintho tsena tseo Ke le boleletseng tsona, le ho le bontša lintho tse tlang ho tla.” Joale Bibele . . .

⁵⁹ Kajeno batho ba re, “Ha ho ntho e kang moporofeta, lefatšeng.”

⁶⁰ Hantle, ke hobaneng ha Pauluse a e behile kerekeng? “Ba pele e le baapostola, baporofeta, baruti, balisa, le baevangeli.” Ruri, ho bile joalo.

⁶¹ Moea o Halalelang ke Moporofeta. “Mohla Eo Moea o Halalelang a theohelang holim’a lona, O tla senola, kapa ho le ruta, ho le bontša. Lintho tsena tseo Ke le boleletseng tsona kaofela esale e le selotho, ha le li utloisise hona joale hobane ha se

tša mongoaha oa lona. Empa mohla Moea o Halalelang a tlleng, O tla etsa hore lintho tseo li phelele hantle, tšepisong. E seng hoo feela, empa O tla le bontša lintho tse tlang ho tla.”

⁶² Thoriso! Kutloano ea Lentsoe la Molimo, tšepiso ea Molimo, Moea oa Molimo. Re phela horeng eo, re shebeletse ho phethahala ha seporofeto sa mongoaha ona, ho etsahala. Re phela nakong e khōlō hakakang! Moea o Halalelang o ne o tla re bontša lintho tse neng li tla tla.

⁶³ Motho o kile a leka ho sibolla le ho iketsetsa lebitso ka ho iketsetsa pontšo e kholo. Ke eng se etsang hore monna a leke ho iketsa ntho e phahameng ho feta e mong? Hobaneng a etsa hoo? Hobane, ka ho eëna, ke tlhaho. Eëna, ka tlhaho, ke moetsalibe, empa ka seemo ke Mora oa Molimo ea oeleng.

⁶⁴ Hobaneng a iketsetsa lelapa le letle hakana, a le ntlafatsa ka linako tsohle? Ke hoba- . . . Nonyana ha e fetole lehae la eona. Kolobemoru e sa phela mobung, joaloka ha e ne e phela lilemong tse sekete tse fetileng. Lea bona? Nonyana e sa ntse e haha sehlaha joaloka ha e entse lilemong tse sekete tse fetileng. Le a bona? Empa motho o ntse a eketsa. Hobaneng? O . . . ‘me ke— ‘me ke mora oa Molimo ea oeleng. Ntho e ka ho eëna e ‘molella hore paleise, e ntle ho feta, ‘me ntho e teng ka ho eëna e lekang ho e tsoma. E a e batla. Oh, ha re ka sheba a mang a malapa ana kajeno, ao a tla ba joang mose? Athe tlhaho e oeleng e ka etsa ntho e kang ena, e tla ba eng?

⁶⁵ Empa ke sona se mo etsisang hoo, tlhaho ea hae kahare ho eëna. Leha a oele, o leka ho iketsetsa ho hong. O leka ho etsa hoo. Esale ho tloha tšimolohong.

⁶⁶ Adama, o lekile ho bopa borapeli bo phahameng ho se pheko ea sebe. Ba sa ntse ba leka ho e etsa. Borapeli bo phahameng, ho cheta bolumeli a tle a phele ka mokhoa ofe a batlang ho phela, ntle le tefelo, ‘me a ‘ne a ikoahela ka sekhurumetso. O lekile ho e etsa qalong, ‘me o sa ntse a leka ho e etsa.

⁶⁷ Empa tsela ea Molimo e hlophisitsoeng e ne e le tefelo, ‘me e ke ke ea sebetsa ka tsela esele. E tlameha ho khutlela tefelong.

⁶⁸ Nimrode o lekile ho haha tora e phahameng, tora ea bolumeli. Hore na ho ka ba le motho ea . . . Toranyana e ka ba bophahamo ba maoto a mashome a mararo, empa o ne a batlile ho etsa ntho ea tonana, ntho e kholoanyane, eaba o ikahela tora. E ne e le letsatsing la hae.

⁶⁹ Nebukadnesare o ne a batla ho haha motse o moholo. A qopitsa paterone Leholimōng, lirapa tse leketlang, noka ea Eufrate, pel’a terone; joaloka Metsi a Bophelo, Noka ea Bophelo, e phallang e feta Teroneng ea Molimo. O lekile ho bopa motse o moholo.

⁷⁰ United States, lilemo tse ‘maloa tse fetileng, e lekile ho tea sekepe se sehlo. Ba se tea, ‘me ba re, “Se ke ke sa teba. Se ke

ke sa tebisoa.” Molimo oa nyametsa Titanic botlaseng ba leoatle. Hoo ho supa katleho ea motho e ke ke ea thusa ka letho. Ntho eohle ke lerole ‘me e khutlela leroleng, se leng ka ho eëna.

⁷¹ Rashia, kajeno, e leka ho hlhisa ramahlale e moholo ea ka etsang lintho tse ling tsa mahlale, ho hapa lefatše.

⁷² Fora, ha se khale haholo, ba hopotse ba ka boloka basali ba bona, veine, le monyaka o moholo; kahoo ba iketsetsa seo ba se bitsang Lerako la Maginot, ba lebisitse lithunya tsa bona kaofela Jeremane, sera se sehlo. “Ha ba ka tla ka tsela ena! Re tla phela kamoo re batlang. ‘Me re tla haha lerako le leholo mona kantle, re le etse ka konkrite, re supe ka lithunya tsa rona. Haeba ba ka tla, re tla tobetsa konopo; tsohle li tla thunya li ba busetse morao Jeremane.” Jeremane e le le pota ka morao. Ba lebetse.

⁷³ Joale re lebetse joalo! Molimo, ka letsoho la Hae le matla, o bontša lefatše lena hore le ke ke la tiea. Empa ba batla pontšo e kholohali.

⁷⁴ Ba ba iketsetsa Lerako la Maginot, ‘me Jeremane ea hoanta e le pota morao, hoba ba ile ba lebala. Ka hona, ba ka hloma sethunya torung e bilikanang, ba ka e phikolosetsa nqa e ‘ngoe le ho thunya. Ba ile ba lebala seo.

⁷⁵ Ke seo kereke e se lebalang kajeno. Ba na le kereke e kholohali. Ba na le mokhatlo o moholohali. Ba na le batho ba apereng hantlehali. Ba na le sohle seo ba se batlang, le barerihali ba thutohali. Empa le le bale hore Lentsoe la Molimo le ke ke la hloleha. Le tlameha ho tla ka tsela eo Molimo o itseng le tla tla ka eona. Ha ho mokhoa oa ho e qoba.

⁷⁶ Ha ntano latela Jeremane, hamorao. Ba hopotse e le leqeka le letle, kahoo ba le hlophisa ho retolosetsa lithunya tsa bona nqa esele. Eaba ba iketsetsa lerako, le bitsoang Lerako la Siegfried, empa libomo tsa ma-Amerika tsa ba phatlola tsa ba hotolla mobung. Lea bona?

Ba ntse ba leka ho etsa ntho e kholohali, e kholohali, ka linako tsohle.

⁷⁷ Likereke kajeno li batla mokhatlohoali oa tsona. Re lekile ka nako e telele, Mamethodise a hapa tsohle, Mabaptise a hapa tsohle. Eaba Pentekosta e fihla lephallong, ba hapa tsohle. Makatolike a leka ho hapa tsohle. Ka hona ba fumana, sehlotšoana se qhalaneng, ha ba khone ho e etsa. Empa ha o ka li kopanya, kamoo e utloahalang e le Mangolong! “Re ikopanyeng! Re ikopanyeng, re tla e etsa. Re tla lelekela bokomonisi leoatleng.”

⁷⁸ Ha ba tsebe hobane Molimo o hlhisitse bokomonisi ho ba fekisa. Ke lentsoe le leholo ho moreri ho le bua. Empa ke kulisoa haholo ho utloa sena, “Bokomonisi! Bokomonisi!” Le tseba lipontšo tsa bokomonisi. Empa hora eo le phelang ho eona, ha le tsebe letho ka eona. Na ha le tsebe Molimo o tšepisitse

ho etsa hoo? Joaloka ha A qalile, ho hlhisa Nebukadnesare ho timetsa Iseraele, hoba ha ba tsamaea tseleng ea Hae. Biblele e ruta hoo ka ho hlaka hore, ‘me ena ke hora ea hore e etsahale.

⁷⁹ Re a fumana, letsatsing leo re phelang ho lona, lintho tsena tsohle. Ha se ntho e patiloeng, ke ntho eo Molimo a e senotseng Lentsoeng, empa batho ba fofetse haholo ho e bona.

⁸⁰ Kajeno rea nahana, “Be, joale, ha re ka kopana bohle bonngoeng bo leng teng, kapa lekhotleng, ‘poloko e teng ha baeletsi ba le bangata.’”

⁸¹ Ke ‘nete, empa u ikamahanya le letšoele la mofuta ofe? Le ka tsamaya hammoho joang? Le ka kopanya mekhatlo ena joang? Ba bang ke balumeli, ‘me ba bang ke ba sa lumeleng, ‘me ba bang ke baikaketsi, le tla ba kopanya joang ‘me le tsamaee ‘moho? “Ba babeli ba ka tsamaea ‘moho joang athe ha ba lumellane?” e boetse e ngoliloe. Shebang mona seo ba se etsang, ba iketsetsa letšoele.

⁸² Khetlo le leng ba entse ntho e tšoanang Bibeleng, mohla Akabe a neng a le mathateng, ‘me, kapa Akabe a romela Josafate ho theoha ho tsoa—ho tsoa Judea le—le ho fumana haeba a ka teanya mabotho a hae ho mo thusa ho loana ntoa. ‘Me Josafate, molumeli ea fapohileng kamano le Molimo oa hae, a theohela mono ‘me a re, “E.”

⁸³ A re, “Setša se teng holimo mono sa rōna. Ke sa rōna, Molimo o re file sona. Moporofeta Joshua o re abetse mobu oo, ‘me joale re fumane hore oetse ho sera. Sera se lema koro mono, e lokelang ho kena maleng a rona Baheberu, ‘me joale ba e isa mono le sera.” Ho re, “Na re ka nyoloha? Na u tla nyoloha le ‘na?”

⁸⁴ Be, joale, Josafate, a sa nahana habeli, a re, “Ee, ruri. Makoloi a ka ke a lona. Bakalli ba ka ba lipere ke ba lona. Banna ba ka ba maoto ke ba lona. Re baena. Ha re lumellaneng ‘moho, re tla tlabola selekane ‘me re tla nyoloha.” Eaba e a mo tea, “Re mpe re batle Molimo, pele.” Oh, khili!

⁸⁵ Pele u ingolisa le ntho eo, u mpe u batle Molimo, pele. U mpe u fumane pele u lahlela kereke ea hau Babilona e kang eo. U tla tlameha ho e etsa, kapa u amohele letšoao la sebata. Empa tsoelapele.

⁸⁶ Ba re, Akabe a re, “Ruri, ke tlamehile ke be ke ile ka e nahana.” Ho re, “Ke tšoare makholo a mane tlase mona seminaring, baporofeta ba Baheberu, ba khabane ka ho fetisisa naheng. Ha ho ba fetisang ka molemo, kae kapa kae. Re tla ea ba lata.”

⁸⁷ Eaba ho nyoloha baporofeta, ‘me bohle ba porofeta. Ehlile, ba ne ba khema hantle le—le mohopolo o nepahetseng, ba hopotse joalo. Ba itse, “Ruri, ke lefa la Iseraele. Haeba Molimo a le neile Iseraele, ke la Iseraele.”

⁸⁸ Empa Molimo o u neha lintho tsena feela tlasa lipehelo. Ke nahana joalo ka lineo tsa Moea, ka har'a Kereke, kajeno. Bongata bo li tlaleha li loketse teng. Empa e tla fihla mono feela tlasa lipehelo.

⁸⁹ Moreri ea tummeng o mpoleletse, nakoana e fetileng, "Na u ke ke ua lesa ho qoholla basali bao le banna, ka *sena*, *sane*, kapa *se seng?*" A re, "Ba u nka u le seboni, kapa moporofeta." A re, "Hobaneng u sa ba rute ho amohela Moea o Halalelang le lineo tse kholo?"

Ka re, "Ba ne ba tla etsa'ng ka tsona?"

⁹⁰ Ho re, "Uena, u tlameha ho ba ruta lintho tse molengoana ho feta ho leka ba bolella ho kuta moriri oa bona joang le ho apara liaparo tsa bona, le lintho tse joalo. Hase tsoanelo ea hau ho etsa joalo."

⁹¹ Ka re, "Nka ba ruta algebra joang athe ha ba mamele li-ABC tsa bona?" Le a bona? U tla e khona joang? Ba na le . . . Molimo o aba lineo tsena holim'a lipehelo.

⁹² 'Me naha eo e le lefa la Iseraele, tlasa lipehelo tsa hore e lula e tšepahetse ho Molimo. Empa shebang moferekanyi oa bona mono oa molisa, a mpa a lumella borapeli ba liseto le dintho tse ling kaofela ho kena. Empa baporofeta, ba e hopola e le ea Molimo, e ne e le lefa la Iseraele, e ne e le kabelo ho Iseraele, ba ne ba loketse ho e rua.

Ke eona ntho e etsahalang kajeno.

⁹³ Empa hopolang mohla bohle ba neng ba porofeta ka khopolo e le 'ngoe, 'me e mong oa bona, ke a kholoa, Zedekia, a iketsetsa sete e kholo ea linaka tsa tšepe. A re, "U tla nka tsena 'me u theselele Basiria kantle ho naha, ka tsona."

⁹⁴ 'Me ha ea lula monna enoa oa molumeli hamonate, ea lokileng, monna oa boitsoaro, Josafate. A re, "Be, ha le sa na e mong hape?"

⁹⁵ "E mong hape, athe re na le makholo a mane? Makholo a mane, ba khopolo 'ngoe, ba re, 'Re tla thea Lekhotla la Likereke. Re tla—re tla e etsa feela.'" Le a bona, bohle ba ne ba le bonngoeng. Ho re, "Bao, e mong le e mong, ba lumellana." Ho re, "Hobaneng u sa tsoelepele feela 'me u nyolohe le 'na?"

⁹⁶ A re, "Na ha ho sa na e mong eo u ka mo botsang ka sena, ea holehaneng le Molimo?"

⁹⁷ A re, "E, e mong o teng, empa ruri ke mo hloile." Ke eona.

⁹⁸ "Oh, khosi a se riatso," ho rialo Josafate. "Ha re—ha re ee ho botsa eëna le—le ho bona seo e tlang ho ba sona."

⁹⁹ A re, "E mong o teng, e-ea, ke a mo tseba, mora Imla," ho re, "Mikea. Empa," ho re, "Ke mo hloile." Ho re, "O lula a nthohaka kamehla. O lula a mpolella hore ke phoso 'me—'me lihele li nkemetse." Ho re, "Ha ke batle le ho mo utloa a rera. Ha

ho moreri le le ea mong ea mo amohelang likerekeng tsa bona.”
 Ho re, “Re mo rahetse kantle, khale koana, kantle ho setlamo.”
 Ho re, “Ha ke tsebe le moo u tla mo fumana teng.”

“Oh,” a re, “morena a se ke a rialo. Ha re eo mo lata.”

¹⁰⁰ Eaba e mong oa mokhatlo o a mo latela. A re, “Joale, Mikea, u na le monyetla oa ho buseletsoa setlankana sa hau sa botho hape, ha u ka bua seo ba se buang. Ua bona, ha u ka e etsa feela, ha u ka lumellana le rōna, hore bohle re kene lekhotleng ‘moho, re tla mpa . . . u tla ba e mong oa rona.”

¹⁰¹ Oh, empa kamehla Molimo o na le motho ea tla ema a tiile. A re, “Ka Morena Molimo o phelang, ke tla bua feela seo A mpoellang ho se bua.” Amen.

¹⁰² Eo e ne e le pontšo ho Josafate. Le tseba pale eo. Le ho re, “Hobane’ng, Molimo o boletse!” Leha makholo a mane lekhotleng a ne a le khahlano le eëna, koana a ema. ‘Me e ne e le pontšo ho Josafate. Mme Josafate a hana ho tsoela mono.

¹⁰³ Kahoo re fumana hore sephetho se bile joang, hoba lentsoe la monna eo le ne le ipapisitse le lentsoe la moporofeta ea porofeteleng letsatsing la Akabe, “Hobane o tlositse Naboth e lokileng a mo hlaba, le lintho, Molimo oa ‘molella, ka moporofeta Elia, ho re, ‘Lintja li tla nyeka mali a hau,’ ke hantle, le se neng se tla etsahala, le kamoo li tla ja Jesebele ka teng.” A porofeta. E ne e le Lentsoe, ‘me Mikea e le eëna ea neng a ka le phethahatsa. Amen.

¹⁰⁴ E ne e le pontšo ea moporofeta ea letsatsi leo, hola feela ba ka mo mamela! Ha eso hlolehe, Modimo o e romela kamehla.

¹⁰⁵ Motho e mong le e mong o lula a batla pontšo. Re lokela ho batla lipontšo. Ke hantle. Empa borapeli . . . lipontšo tsa Mangolo, e seng lipontšo tsa borapeli; lipontšo tsa Bibebe.

¹⁰⁶ Motho e mong le e mong o ne a tla batla pontšo, ‘me ba tsebile lena e tla ba letsatsi le leholohali, Molimo o bona qetello esale qalong, ka hona O itse, “Ke tla ba fa sesupo, sesupo se hlolang. Ke tla ba fa sesupo sa ka ho isa ka ho ileng.” Amen. “Ke tla ba fa e sa tl’o hloleha ‘me e sa tl’o fela le ka mohla.” Amen. “Ba batla pontšo, ka hona Ke tla ba fa e ‘ngoe, pontšo e kholohali.”

¹⁰⁷ Ha A tla ka phatsimo ea lefatše, kamoo ba neng ba Mo lebeletse ho tla kateng. Empa O itseng? “Moroetsana o tla emola.” Amen. E ne e le pontšo eo. E ne e le pontšo e kholohali eo. “Moroetsana o tla emola.” Amen. Pontšo e kholohali, pontšo e kholohali; e seng pontšo ea tlhaho, empa pontšo e kholohali; moroetsana ea emolang, le a bona, pontšo e mohlolohali. Mohlolohali! E ne e le pontšo e kholohali, hoba moroetsana a ne a eso e etse pele, empa, “O tla emola.”

¹⁰⁸ E ne e tla ba eng? “Lebitso la Hae o tla bitsoa Emmanuele.” Ho tla ba joalo joang? “Molimo le motho e tla ba ntho e le ‘ngoe.” Ke pontšo e kholohali eo.

¹⁰⁹ Oho Molimo, hola lefatše le ka bona hoo feela, hore Molimo le motho ba bang! Pontšo e kholohali e ne e le Monna eo Molimo o neng o ka kena ho eèna; sohle seo Molimo o neng o le sona O se tšetse ka ho Kreste, ‘me sohle seo Kreste a neng a le sona O se tšetse ka har’a Kereke. Pontšo e kholohali, Molimo le motho, ‘moho, e ne e tla ba pontšo e kholohali ea letsatsi la ho qetela, mohla Bibeletsoe eohle e neng e tla phethisoa matsatsing a qetelo.

¹¹⁰ Pontšo e kholohali, “Moroetsana o tla emola. ‘Me kemolo ena, ha E hlalisoa, e tla ba Molimo o bonahetseng nameng,” pontšo e kholohali. Le joale ha ba e lumele, empa e ne e le eona leha ho le joalo. E sa ntse e le pontšo e kholohali.

¹¹¹ Lemohang, pontšo e kholohali! Ba na le monna ea moholohali kajeno, ba na le litšomo tsa monna e moholohali, lintho tsena tse ling tsohle tse kholohali. Empa Kereke e tsoere pontšo e kholohali, Molimo o khutletse Kerekeng, o bonahatsoa nameng ea motho. Molimo o kopane le motho, pontšohali ea Hae e tiileng ka ho fetisisa!

¹¹² Lemohang pontšo ea Bosafeleng, pontšo e sa hloleheng, E ke ke ea hloleha. Motho le . . . Lentsoe le motho li e-ba bang. Ha Lentsoe la Molimo le motho ba eba bang, joalokaha St. Johanne khaolo ea 1 e re, “Lentsoe le ne le le tšimolohong, ‘me Lentsoe le ne le le ho Molimo, ‘me Lentsoe e ne e le Molimo. ‘Me Lentsoe le ne le etsoe nama la aha har’a rōna,” eo ke pontšo e kholohali.

¹¹³ Oh, haeba e ne e le pontšo e kholohali ea letsatsi leo, mohla ‘ona Moea oo o neng o le holim’a Jesu Kreste o kenang Kerekeng ea Hae, ho bonahatsa Lentsoe le ngoliloeng la kajeno, eo e sa ntse e le pontšo e kholohali.

¹¹⁴ Kereke e ka ba le pontšo ea Lekhotla, kaofela ha bona ba bokanela khotso ea lefatše ea bohata, le sohle seo ba batlang ho ba sona. Mabaptise a ka re, “Re fumane milione o mong ka ’44.” Mamethodise a ka ithorisa ka mokhoa ofe oo ba o batlang, Onness, Trinity, e ka bang eng.

¹¹⁵ Empa pontšo e kholohali, le joale, ke Molimo o lulang o tšephele pontšong eo e kholohali: ke Molimo ka ho motho, o bonahatsang Lentsoe la Hae le ngoliloeng. Lentsoe la Hae, “Mohla Eo Moea o Halalelang a tiileng ho lona, O tla senola lintho tsena, ho le bontša tsona, le ho le bontša tse tlang ho tla.” Baheberu 13:8, “Jesu Kreste eèna maobane, kajeno, le kamehla.” Hantle feela.

¹¹⁶ Peō e kholohali ea Abrahama, E ne e le eona, Mora e moholohali. Abrahama o ne a fumane mora a le mong, a tsoala hoo ka nama ea tlhaho, e ne e le Isaaka. Eaba o fumana Mora e mong, ‘me Mora eo e ne e le ka tumelo, e ne e le Jesu; E ne e le Mora oa Abrahama, Mora Davida, Mora Molimo. O e bone pele ponong. Tumelo Lentsoeng la Hae la pallo, e supiloa ho oa ho qetela . . . ho bontša, matsatsing ana a qetelo, Abrahama. Re lokela ho ba Peo ea Abrahama. Haeba re shoele ka ho Kreste,

re Peo ea Abrahamama; le mojalefa le Eèna, ho latela tšepiso. Joale, hobaneng pontšo e kholohali ena e fuoe Abrahamama? Hobane e tla hlalisa pontšo e kholohali ea letsatsi la ho qetela. E tlameha ho bonahatsoa.

¹¹⁷ Molimo o bontšitse Abrahamama qetello ho tloha qalong, le se neng se tla etsahala; Molimo o bonahatsoa ka ho Monna, Mora oa Hae oa tumelo e kholohali. Monna ea neng a ka sitoa ho timetsa Mora enoa; ba ne ba ka timetsa Isaaka, ba ne ba ka timetsa Jakobo, le bahlahlami ka mora bona, empa Mora enoa oa senatla a ke ke a timetsoa. Abrahamama, Peo ea Abrahamama, tumelo ena, eo, e seng peo ea tlhaho, empa tumelo eo Abrahamama a e amohetseng, e seng ka molao oa lebollo; empa ka tumelo Lentsoeng, Mora oa tumelo e kholohali oa Abrahamama, eo e neng e le Jesu Krete. Joale, bara ba hae bohle ba shoele, empa Mora enoa a ke ke a bolaoa. O ne a bolaoe, empa a ke ke a lula a shoele. Lebitla le ne le ke ke la Mo tsoara. Esale Eèna maobane, kajeno, le kamehla.

¹¹⁸ Lemohang Genese 22:16 le 17, holim'a thaba moo Molimo o bontšitseng Abrahamama ho ea teng, 'me teng a bona pheleu e tsoasehile ka linaka tsa eona, felleng. Lemohang, ka potlako joale. Hobane nke Isaaka a mo tlama, e beng e le mora oa hae oa tlhaho, a mo robatsa holim'a e—e aletare, ho nka bophelo ba hae; eaba o qala a nka bophelo ba hae, ka kutlo ea lerato ho Molimo. 'Me, hoba a etse, ntho ea etsahala. A utloa Puo, e re, "Abrahamama, khutlisa letsoho la hau, hoba Ke a tseba u a Nthata." Me eaba o utloa e—e pheleu e lla, e tsoasehile ka linaka lefelleng, ka mora hae. 'Me a reha tulo eo lebitso la Jehova-jireh.

¹¹⁹ Lemohang, Molimo o itse, "Me peō ea hau," peō ea Abrahamama joale, "e tla rua likhorō tsa lira tsa eona." O ne a tla hapa likhorō, ho rua likhorō. O e tšepisitse. Joale, peō ea hae ea tlhaho e entse hona hoo. Peō eohle ea tlhaho ea Abrahamama e ne e le baporofeta ba tla mo latelang.

¹²⁰ Moshe e ne e le eo, peo ea Abrahamama, 'me, hoba a etse, a fihla khorong, leetong la kutlo. O tlile khorong ea Leoatle le Lefubelu, hoba a rute bana ba Iseraele ba lefatše la pallo leo Molimo o le tšepisitseng. E ne e le moporofeta oa Molimo. O ne a bonahalitsoe ka pel'a batho, joaloka moporofeta oa Molimo. Molimo o bopile, ka eèna. Molimo o entse lipontšo tsa mefuta eohle le meeka, ka eèna. 'Me a tiisetse Lentsoe la Molimo hantle, hoba a batlile Molimo, pele. 'Me o tsebile malulo a hae. O tsebile hore o tsoaletsoe mongoaha oo, ho bonahatsa Lentsoe la Molimo mohlang oo. Mme hape, hantle leetong la kutlo, a ema khahlano le seo a sa tsebang hore a etse'ng, e ne e le Leoatle le Lefubelu. Be, ho etsahetse'ng? Peō ea Abrahamama e tšepisitsoe ho rua likhorō tsa lira. Kahoo ha Leoatle le Lefubelu le fetoha khorō eo a neng a sitoa ho kena ka eona, Molimo oa hata temeng 'me oa hapa khorō 'me a tsamaea le eona, 'me Moshe a tšela leoatle mobung o omileng. Peō ea hae e ruile khorō.

¹²¹ Bana ba Baheberu ba hapile likhoro seboping sa mollo se sitiloeng le ho ba chesa.

¹²² Daniele o hapile likhoro tsa lira molomong oa litau tse ke keng tsa ahlamolloa ho mo ja.

¹²³ Samsone, ka nako e 'ngoe a tšoeroe ke... Sehlopha sa batho se ne se mo pota-potile ka har'a motse. 'Me, hoba a etse, a pshemola likhorohali tse khōlō tseo mafikeng, a li beha mahetleng a hae 'me a nyoloha leralla. Hobaneng a ne a le joalo? O ne a sa ntse a kene selekaneng, lithapo tsa hae li ntse li leketlile ho eena. Tšepiso e ne e ntse e le teng mono, "Me o tla rua likhoro tsa sera sa hae." Amen. Ehlile, ruri.

Bahale bana bohle ba shoeleng, ba khabane ba tumelo. Kaofela ha bona ba ile ba shoa.

¹²⁴ Eaba ho fihla temeng Peo e kholo ea Abrahama, Peo ea borena, e kholohali, Peo ea borena, Jesu Krete, e beng e le Mora oa Abrahama ka tumelo; eo a mo boneng ka tumelo, ka tšepiso ea Molimo, hore o tla hlohonolofatsa bohle, e be ntate oa lichaba tse ngata. Peohali ea hae e phahameng ea fihla.

¹²⁵ Ba bang bana ba entse'ng? Ba ruile likhoro tsa litau, likhoro tsa mollo, likhoro tsa leoatlē, likhoro tsa motse. 'Me hohle moo ba fihlileng teng, ba khonne ho rua likhoro hobane ba e tšepisitsoe. Empa, eitseha lefu le fihla, bohle ba tlameha ho shoa.

¹²⁶ Joale Peō ea borena ke ena e fihla. Ha A ka a rua likhoro tsa sera feela, empa O ne a ruile likhoro tsa lefu, lihele, le lebitla, ho tsoha ka letsatsi la boraro le ho bula tsela; ho hahola lesira ho qala holimo ho ea tlase, le ho etsetsa monna e mong le e mong kapa mosali ea lakatsang ho tla ho Eena tsela, a ka tla. A rua likhoro. Ha A etsa hoo feela; empa ba shoeleng, tumelong, O isitse kholehong ba holehiloeng, a nyolohela Holimo, 'me a fa batho lineo. Eo ke Peo e kholohali ea Abrahama. Eo ke Peo ea borena, Jesu Krete, pontšo e kholohali. Hopolang, e ne e le pontšo ea kamehla, pontšo e mohlolohali ea kamehla, Jesu e ne e le eona. O tsohile bafung, li sitiloe ho Mo tšoara. Lefu, lihele, le lebitla, li sitiloe ho Mo tšoara.

¹²⁷ Baheberu 13:8, joalo ka ha ke boletse, "Ke oa maobane, kajeno, le kamehla," ho bontša, ho bontša pontšo e kholo ena mongoaheng ona.

¹²⁸ Shebang, ha re nkeng tsela ea Abrahama, nakoana feela, papiso ea peō ea hae. Abrahama, moporofeta, shebang. Molimo o no a buile le eēna ka litsela tse ngata haesale a tloha Kaldea, motseng oa Ure. O ne a tsamaile leeto le lelelele. 'Me Molimo o mo bontšitse mehlolo e mengata e meholo, ho iponahatsa ho eēna, ho mo bontša lintho tsa mefuta eohle tse neng li tla etsahala, ho mo bolella se neng se tla etsahala. Lintho tsena tsohle tseo A 'moleletseng tsona. Empa pele a amohela mora oa hae oa tšepiso, keha a eme haufi le likhoro tsa Balichaba, ka holim'a Sodoma feela. 'Me le pele a amohela mora oa hae—oa hae e mohlolohali,

kapa mora oa hae ea neng a tla tsoaloe e le mora oa senatla, ehlile, pele a mo amohela (e seng Oa borena joale), empa, pele a mo amohela, o fuoe pontšo e kholohali.

129 E ne e le eng? Molimo oa theohela ho eëna, ka sebopeho sa Monna. Lemohang Monna eo ea buileng le eëna, ea emeng tenteng moo a neng a le teng ‘me a etsa pontšo e kholohali.

130 ‘Me mohla Mora oa hae e moholohali a neng a fihla temeng, Mora oa hae e moholohali o entse pontšo e tšoanang, ho bontša hoba E ne e le Peō e kholohali ea Abrahama. Khanya!

131 ‘Me O tšepisitse nthoe tšoanang matsatsing a qetelo. Na le bona seo ke se bolelang? Abrahama, pele, pele mora oa tšepiso a fihla; joaloka ha re shebeletse joale, Peō ea Abrahama, Peō ea borena. E ne e le peō ea tlhaho; ena ke Peō ea borena. Mohla peō ea tlhaho e ne e fumana pontšo ea bona, ba—ba e hanne; ka hona, ho tla . . . ha se letho haese Peo ea Borena, koana peo eo ea kereke e tla E hana hape. Esale ba e etsa. Empa, lemohang, e ne e le pontšo ea mofuta ofe?

132 Ha re shebang feela ‘me re bone seo pontšo e kholohali e neng e le sona. Monna o nyolohile, ba bararo ba bona. ‘Me na le lemohile, mohla—mohla Abrahama a bonang ho etla banna ba bararo, a tsoa ‘me a re, “Morena oa ka, na U ka feta pel’a ka? Kena lula fatše. Ke tla lata metsana ke hlatsoe maoto a Hao. Le ho ja sengoathana sa bohobe, ebe U tsoella mosebetsing oa Hao.” A bona ba bararo ba etla, ‘me a bitsa ba bararo, Mong, “Morena.”

133 Lota, kereke ea maipolelo a molomo, tlase—tlase mono Sodoma, o bone ba babeli ba etla, ‘me o itse, “Beng ba ka.”

134 Abrahama o tsebile “ba bararo bana ke ntho e le ‘ngoe.” Hantle-ntle ho ne ho ena le a le Mong feela, oa bona. Shebang, ba babeli ba bona ba theohetse Sodoma, ‘me Ea setseng le eëna. O itse, “Morena oa ka.” Lemohang Ea setseng le eëna; Abrahama, e leng papiso ea ba bitsitsoeng, e seng Sodoma, bakhethoa ba hora eo.

135 Joale, hopolang, Balichaba ba ne ba itokisetša ho chesoa, joalo ka hona joale. Lefatše la Balichaba le tla timetsoa ka mollo. Re tseba seo.

136 Joale shebellang pontšo e kholohali. Molimo o ile oa theoha ka sebopeho sa Monna oa etsa pontšo, mokokotlo oa Hae o furaletse tente, le ho botsa moo Sara a neng a le teng. ‘Me Abrahama a re, “O ka tenteng ka mora Hau.”

137 ‘Me A re, “Ke tla u etela ka nako ea bophelo.” Shebang seo “Na,” ua bona, “Ke tla u etela.”

138 ‘Me, shebang, ha A ‘mitsa Abram. Matsatsi a ‘maloa feela pele ho moo, e ne e le Abram. Empa Molimo oa fetola lebitso la hae, ka Moea, o buisana le eëna. Empa Molimo ke enoa ka nama; o ne a sa tsoa ja namane eo Abrahama a e hlabileng, ho noa

lebese la khomo, le ho ja bohobe. E nahaneng. Monna, liaparo tse tletseng lerole, maoto a litšila, amen, Molimo!

U re, “E ne e se Molimo.”

¹³⁹ Abrahama o itse E ne e le eëna, o itse E ne e le “Elohim,” Ea bopileng maholimo le lefatše, Rabokhoni-bohle, Molimo ka sebopeho sa motho. Amen.

¹⁴⁰ ‘Me O ile a etsetsa Abrahama pontšo, ho mo tsebisa seo, hore lefatše la Balichaba le ne le le pheletsong. ‘Me E ne e le Peo e kholo eo. A re, “Sara o kae?”

A re, “O ka tenteng ka mora Hao.”

A re, “Ke tla u etela ka nako ea bophelo.”

¹⁴¹ ‘Me Sara a etsa ho hong. A batla a tšeha. A re, “Hobaneng Sara a tšehile, ho re, ‘Lintho tsee li ke ke tsa eba joalo?” A lemoha mehopollo e kelellong ea Sara, ka tenteng ka mora Hae. ‘Me a tseba hore eo e ne e le Molimo.

¹⁴² Joale shebang. Jesu, mohla A neng a fihla lefatšeng, E ne e le Peo e kholohali eo. ‘Me, ha A tla, O boletse batho ntho eona eo. Na ho joalo? Joale, ka ho tseba nako ena ea bofelo e tla fihla, le ho re, “Lintho tseo Ke li etsang le tla li etsa le lona, hoba Molimo o itse Ke tla le fa pontšo ea Bosafeleng, ea kamehla.” Amen. Ke eo pontšo e kholohali.

¹⁴³ Shebang mohlala oa kereke. E nyolohile ka Luther, Wesley, Mapentekosta, mekhatlo ea malumeli. Re fumane tšenolo le mefuta eohle ea lintho. Re buile ka lipuo. Re fumane lineo tsa pholiso. Re bonahalitse ntho e ‘ngoe le e ‘ngoe.

¹⁴⁴ Empa, shebang, hantle nakong ea qetelo, pele ho tuka le tšeny, pontšo e kholohali e hlaha ka mohlolo, hantle temeng hape ka pel’a rona, amen, Molimo ka Boeëna. E seng motho, empa Molimo o bonahalitsoeng; pontšo e kholohali, pontšo ea kamehla, pontšo ea Bosafeleng, pontšo e kholohali, Molimo o bonahetseng nameng! Pontšo e tsoanang le eo Mora oa Hae a e entseng, Mora oa Hae e moholo o tšepisitse ntho e tsoanang pheletsong, “Joaloka matsatsing a Sodoma, ho tla ba joalo ho Tleng ha Mora motho.” Pontšo e kholohali e tla khutla.

¹⁴⁵ Re fumane lintho tsena tse ling tsohle, tsela ea Peo ea borena ea Abrahama e nyolohile ka eona tsela eo Abrahama a tlileng ka eona.

¹⁴⁶ Empa pele lefatše le timetsoa, pontšo e kholohali e tlamehile ho hlaha hape, pontšo ea Bosafeleng, e sa feleng ea tsoho e pakang hore Peo ea borena e ne e ke ke ea bolaoa joaloka Daniele le joaloka baporofeta ba bang kaofela. Lebitla le sitiloe ho Mo tsoara. Hobane O . . . Ba bang ba hapile likhoro tsa sera, tse kang mollo, le tau, le—le sabole, le joalo-joalo. Ba hapile seo. Empa Peo ena ea borena e hapile lefu, lihele, le lebitla. Ha ho letho le ka Mo tsoarang. Hobaneng? Ke pontšo e kholohali ea kamehla! Pontšo e kholohali ke eng? Tsoho ea Jesu Kreste, kamora ho shoa

lilemo tse likete tse peli, o sa ntse a eme hara rona, joaloka ha A entse mohlang oo, ho Iponahatsa ka hara Kereke ea Hae, nameng ea motho. Esale Eèna maobane, kajeno, le kamehla. Amen.

147 “Moroetsana o tla emola. Me ho tloha mohlang oo, Molimo le motho ba tla ba ‘ntho e le ‘ngoe, ba kopane ‘moho,” pontšo ea kamehla, ea Bosafeleng, pontšo e kholohali.

O a phela, O a phela, Krete Jesu o a phela
kajeno!

U ka mpotsa hoba ke tsebang joang hore O a
phela? O phela ka hare ho pelo ea ka.

148 Ke ‘Mona hara rona. Peo ea Hae eohle e khethiloeng e tla e bona. E, monghali.

149 Bakhethoa ba letsatsi la Hae ba e bone. Ba reriloeng pele ba e bone. Hara ho se lumele, ba ‘na ba e lumela. Ba lutse hantle har’a ba sa lumeleng ‘me ba ‘na ba ipolela phatlalatsa, “Yaa, U Mora oa Molimo, Morena oa Iseraele.” Oh, khili!

150 Hantle har’a likete tsa ba sa lumeleng, monna a le mong, ea bitsoang Simone Petrose, a tsoa. ‘Me A re, “Lebitso la hau u Simone, ‘me u mora oa Josefa.” E ne e le eng? Pontšo eo e kholohali. Ho ne ho eme Moporofeta mono, ho ne ho le pontšo e kholohali, ‘me Simone Petrose a e amohela ho sa tsotelehe seo motho a se buileng. Sehanka sa khale sa fetoha konyana e bonolo ka pel’a Molimo.

151 Lemohang, Nathanaele e ne e le eo, moruti, moithuti oa sebele, ea neng a lumela Molimo. ‘Me Filipi a tloha a mo khutlisetsa motseng oa habo—oa habo, a mo tlisa koano. Mohla a fihlang mono Jesu a na a eme teng, Jesu o itse, “Bonang Moiseralele oa sebele, eo ho seng mano ho eèna.”

152 A re, “Rabbi, U ntsebella kae? Hona ho a makatsa. Ke utloile bontate-ntata-ntata-ntata-ntata-moholo ba bua ka *Sekete-kete* le *Sekete-kete*, morao koana. Ha ke eso utloele ka eona ho ea ka . . . U ntsebile joang?”

153 Jesu o itse, “Le pele Filipi a u bitsa, u sa le tlasa sefate, Ke u bone.” Pontšo e kholohali! Amen. Baprista le borabi ba ne ba felile. Pontšo ea Molimo ea Bosafeleng e ne e le eo. E.

154 A tlameha ho feta le ka Samaria. Hopolang, merabe ea batho e meraro; Kama, Sema, le batho ba Jafeta. O ile a feta kaha Basamaria. Ha tsoa mosali e monyenyanane, selibeng, ho kha metsi. Jesu, hang hoba A bue le eèna, a re “Mphe metsi.”

155 A re, “Ha u na letho ho kha ka lona,” le joalo-joalo. ‘Me moqoqo oa tsoella. Ba ile ba bua ka bothata ba merabe, joalo-joalo.

156 Ka mora nakoana, A re ho eèna, “E-ea u late monna oa hau le tle koano.”

157 Joale o itse, (“Monna enoa o leka ho ntlhalefela,”) le a bona, “Ha ke na monna oa letho.”

158 Ho re, “U boletse ‘nete. U bile le ba bahlano, le eo u phelang le eèna joale ha se monna oa hau.” Pontšo e kholohali!

159 Mo mameleng, “Monghali, ke a lemoha hobane U Moporofeta,” pontšo e kholohali, ponahatso ea Lentsoe la letsatsi leo. Shebang. “U Moporofeta, empa ha ke bone ka Bibeleng moo moporofeta ofe a tlamehang ho ba teng nakong ena. Empa re shebeletse Messia, ‘me, mohla A tlang, O tla bonahatsa Lentsoe la Molimo la pallo. E tla ba Eèna.”

160 Mofumahali eo oa batho o ne a tseba haholo ka Molimo ho feta halofo ea bareri ba letsatsi, maemong ao. Hobaneng? O ne a reretsoe eona pele. Eitse ha Leseli leo le e chabela, peō eo ea rarolohela Bophelong. U ke ke oa e pata. Che.

161 Shebang Nathanaele, o ne a sa tsotelle—o ne a sa tsotelle ea emeng mono. A ema hantle ka pel’a moprista oa hae le tsohle, ho re, “Rabbi, U Mora Molimo. U Morena oa Iseraele eo re mo batlang.” O bone pontšo e kholohali.

162 Mosajana enoa, har’a mathata ‘ohle a hae, a matha a theosa le motse, le ho re, “Tloong le bone Monna ea mpoleletseng seo ke se entseng. Na enoa ha se eèna Messia? Na ha se seo re se batlang?” Pontšo e kholohali!

163 Joale, hopolang, Balichaba ha ba e utloisisa mohlang oo, empa ba loketse ho e amohela hoba Molimo a ke ke a fetola khemisano ea Hae. O loketse joalo. Hopolang, O e tšepisitse. O itse O tla e etsa. O tšepisitse hore O tla e etsa. ‘Me matsatsing a qetelo, O tla e etsa. Jesu o itsalo, “Joalo ka matsatsing a Sodoma, ho tla ba joalo ho tlang ha Mora motho.” Re tšepisitsoe, matsatsing a qetelo, ho latela Malakia 4, hore ho tla hlaha motho matsatsing a ho qetela ea tla leka ho khutlisa, le ho hlhlora serame sohle le meetlo eohle ea bona, le lintho, “le ho khutlisetsa Tumelo ea batho morao ho bontate ba baapostola hape, Lentsoeng la mantlha.” E.

U re, “E ne e le—e ne e le Elia ka ho Johanne.” Oh, che, che.

164 Elia mehleng ea Johanne e ne e le Malakia 3, “Ke roma morumooa oa Ka pela sefahleho sa Ka.”

165 Hobane, hang hoba seporofeto *sena* se hlahe, lefatše lohle la chesoa. Ho se ho fetile lilemo tse likete tse peli, ‘me lefatše ha le a ka la chesoa. “‘Me ba lokileng ba tsamaea holima lerōle la—la melora ea bakhopo.”

166 Moena, khaitseli, re phela matsatsing a limmaraka tse kholohali, lifofane tsa lebelohali, mebila e meholohali, mabelo a maholohali, le tsohle tse ling tse kholohali. ‘Me ho na le pontšo e kholohali! Re bile le pontšo ea borapeli. Re bile le pontšo ea litsoseletso. Re bile le pontšo ea ho kopana ‘moho. Re bile le

pontšo ea ho bua ka lipuo. Re bile le pontšo ea ho folisa bakuli. Re bile le lipontšo tsena tsohle.

¹⁶⁷ Empa, koana, re fumana ka Bibeleng hore, pontšo ea ho qetela pele Mora oa tšepiso a fihla, e ne e le pontšo e khohloali. Jesu o itse, “Joaloka mohlantsoe; pele Mora oa tšepiso a khutla hape, pontšo eo e khohloali e tla fihla lefatšeng hape.” Kea le tsebisa, bosiueng bona, ka Lebitso la Jesu Krete, e lefatšeng joale. E seng hoo feela, empa e mona hara rona bosiueng bona. Moea o Halalelang, pontšo e khohloali ea Molimo, Jesu Krete ea tsohileng, E ke ke ea hloleha. Ke pontšo ea Bosafeleng. E ke ke ea fetoloa le ka mohlal. “Maholimō le lefatše li tla feta, empa Hoo ho ke ke ha fetoha le ka mohlal.” Ke pontšo ea Bosafeleng, ea kamehla, Molimo o bonahatsoang nameng ea motho. Molimo o Itsebisitse nameng ea motho.

¹⁶⁸ Le a lumela hoo e le ‘Nete? [Phutheho e re, “Amen.”—Mohl.] Ka pelō eohle ea lona, u a e lumela na? [“Amen.”] U se ke ua ikoalla joaloka khulu ka har’a khetla. Haeba khulu efe e ahile ka ho uena, ntša khetla. Ere Moea o Halalelang o kene. Se ikoalla ho tumeloana kapa mokhatlo o itseng. Moena, khaitsetsi, hora e fihlile. Ke lumela Molimo a entse hakaalo kamoo A tlang ho etsa. Ntho e latelang ke khato ea kereke kapa re tla lahleha.

¹⁶⁹ Ke kopa mang ho latola hoba ho joalo. Ke e botsitse lefatše ka bophara le ho pota, ‘me ha ho mohlal motho e mong le e mong a kileng a e leka. Ba tseba hantle ho feta. Ba tseba betere, hoba ke Lentsoe, ‘me Molimo o paka hore Ke Lentsoe la Hae. Joale hobaneng u sa e amohele? Amen. Haeba e le nako, u se ke ua e lebalisa halelele.

¹⁷⁰ Batho ba bangata ba ne ba batla ho amohela Jesu. Ba hopotse ba tla e etsa, “ka nako e ‘ngoe e loketseng,” e mong boletse. Ba batla ho amohela Krete, empa ba e lebalisa nako e telele. Ba bang ba bona ba leka ho Mo tloa matsohong a bona, le ho leka ho e hlatsoa ka metsi, ho motho e mong libata, empa ea hloenya.

¹⁷¹ E matsohong a hao, bosiueng bona, e lahleloa hantle liatleng tsa hao! Baheberu 13:8, ho sa tsotelehe re tšoare Lekhotla la Likereke tse kae, e sa lutse e le “Jesu Krete maobane, kajeno, le kamehla.” “Mesebetsi eo Ke e etsang!” Haeba—haeba Bophelo ba Hae bo ahile ka ho uena, bo tla bonahatsa Jesu Krete. Amen.

¹⁷² Joale bohle le ke ke la ba eo, empa le ka ba karolo ea seo, ka tumelo ea lona.

¹⁷³ Bao bohle e ke ke ea eba Jesu, mehleng ea bona lefatšeng, empa ba ne ba ka lumela ho Eena ‘me ba amohela molaetsa. Ho bile le Moshe a le mong, Elia a le mong, Nohe a le mong, ho theoha joalo, esale ho le joalo, empa ba bang kaofela ba ne ba ka e amohela. ‘Me ba ka be ba se na tšebeletso, haese ha ho bile le motho ea u lumelang. Jesu a ka be a se na tšebeletso haese ha motho e mong a e lumetse. Pauluse a ka be a se na tšebeletso haese ha motho a e lumela.

¹⁷⁴ Moea o Halalelang ha o na tšebeletso ka Lentsoe, kajeno, haese ha motho a ikemiselitse ho suthela hole le tumeloana ea bona le ho khutlela Lentsoeng hape, ho sa tsotellehe e mona hantle hakae le hore e mona ka 'nete hakae. E teng mona hona joale. Ke a tseba hore e teng mona. Ke a e utloa. Ke a tseba e teng mona. Lentsoe le re e teng mona. "Moo ba babeli kapa ba le bararo ba phuthehileng ka Lebitso la Ka, Ke hara bona." 'Me ruri ke lumela A le teng mona, "eena maobane, kajeno, le kamehla."

¹⁷⁵ Oh, hola nka fumana tabernakele e nyenyane ena . . . Ke a le rata. 'Me ha ke kholoe ho le monna lefatšeng eo nka reng ke mo ratile ho feta Jack Moore, 'me, ke hantle, Young Brown, le Lyle, le banna bana mona. Ke balile seratsoana kajeno, seo Anna Jean a se ngotseng, ke tla mo kopa tumello ho e hatisa hape, ea lintho tse khabane tseo ba ka li buang. 'Me—'me, sheba, empa ha u sa phaphame, ka potlako, nako e tla be e fetile. Tabernakele ea Life, ke karolo ea lona, 'me ke ka lebaka leo ke howang. Selemo le selemo, ke e fumana e phola. Mohlomong ha u e hlokomele, u lula ho eona, empa lula lebaleng 'me u khutle le mehopolo ea selemo pele ho moo. Na ha Ke a u bolella kantle mono ka tenteng e nyenyane eo, bosiu bo bong, "Ho tloha horeng ena ho ea pele"? Ke itseng ka Shreveport mohla mosali eo a neng a ngolla ha litšila nakong eo?

¹⁷⁶ Le sa hopola seo ke se buileng mohlang oo ka United States, lilemo tse tharo kapa tse 'ne tse fetileng, tse hlano, eaba e haola lipampiring tsohle? Ka re, "Monongoaha United States e tla amohela Evangeli ho seng joalo ba ke ke ba e etsa le ka mohla." Esale ba hana ho tloha mohlang oo. 'Me ha ho sa tla ba le e—e tsoeletso e khōlō Amerika e kang eo. Ha le lumela ke le moporofeta, le hopole leo ke Lentsoe la Morena. Le shebe feela 'me le bone haeba e sa shoe. Likereke li a shoa. Li a omella. 'Me e a mpolaea, ka hare ho 'na, ho tseba hoo, banna le basali bao ke ba ratang ho feta kamoo ke ratang bophelo ba ka, bao ke nejhetseng bophelo ba ka.

¹⁷⁷ Ke kene har'a lōna joaloka moena oa lōna, e seng Molimo oa lōna, moena oa lōna; e seng sera sa lōna, moena oa lōna! Ke le boleletse 'Nete, 'me Molimo o e buile ka ho tšoana. Ka Lentsoe le leng le le leng leo ke le rerileng, O E boletse e le 'Nete, hantle feela. Joale hobaneng u sa E amohele, moena, khaitseli? Leratong la Jesu Krete, hobaneng u sa E amohele? Ha u ka lumela feela hore Hoo ke 'Nete, amohela feela hore Ke 'Nete, ke phetho seo ke u kopang ho se etsa.

¹⁷⁸ Ha re inamiseng lihlooho tsa rōna nakoana feela. Ke tla emisa mono lintlheng tseo hantle mono. Ke itse ke tla memela aletare, le ho lumella Billy Paul ho aba litlankana tsa thapelo. Re ne re se na litlankana tsa thapelo, bosiu bona, nako e ne e tsamaile ho li aba. Ke—ke lebetse tšepiso ea ka. Ke tla mo tliša mona hosane bosiu, ha e batlile ho ba hora ea botšelela. Ha re hloke litlankana tsa thapelo, le hona. Kamehla ke lekile ho le

tlosa moetlong oo, oa ho beha matsoho joaloka ha Bajuda ba ne ba etsa. Jariuse a re, “Tloo behe matsoho a Hao holima morali oa ka ‘me o tla phela.” Moroma o itse, “Bua lentsoe feela,” e ne e le mokhoa oa Balichaba oa ho le lumela.

¹⁷⁹ Haeba ke le boleletse ‘Nete, joale mamelang phephetso ena; haeba ke u boleletse ‘Nete, ke tlameha ho ema mona kalaneng ena ka pel’a lōna le ho le bolella sena. ‘Me ho u bolella ho thusang, haeba Molimo a le sieo ho eona? ‘Me haeba e le ‘Nete ea Molimo, O—O tlamehile ho E tšehetsa. O tlameha ho E tšehetsa, O tšepisitse hore O tla etsa joalo.

¹⁸⁰ Empa na—na re tla lula re shoele bohatsu? Na Moea o . . . Na ke “Ikabod” holim’a Life Tabernacle? Na hoo ho ngotsoe holima tabernakele? Na seo se ngotsoe likerekeng tsohle tseo ke li etetseng naheng ka bophara? Na ho lefifi hona ‘me ho teteane hoo “e mong *mona* le e mong *mane*; e mong tšimong, ‘Ke tla nka e mong,’ ‘me mohlomong e mong ka nqane ho lefatše, ‘me, ‘Ke tla nka e mong’”? “Joaloka matsatsing a Nohe, moo ho bolokehileng meea e robeli ka metsi, ho tla ba joalo ho tlang ha Mora,” na re fihlile sebakeng seo?

¹⁸¹ Na tšebeletso ea Jesu Krete, tsatsing lena, e bapisitse letsatsi leo A neng a le mona mohla A neng a rera pele? Mohla E ne e le Moporofeta e mocha oa Mogalelea, bohle ba ne ba Mo batla kerekeng ea bona, ha A ne a folisa bakuli, le ntho eohle. Empa mohla A ne a porofeta a ba khalema, a ba bitsa “sehlopha sa marabe,” hantle mohlang oo O ile a qala a qepha, ‘me qetellong seo sa lebisa thakhisong ea Hae, polao.

¹⁸² Empa, hopolang, O ne a tšoere tšebeletso e ‘ngoe, O reretse ba lahlehileng ka Bosafeleng le ba ahlotsoeng, ba sa kang ba baka matsatsing ao ba fuoe monyetla oa ho baka. Na boromuoa boo bo tla khutla joalo, hore boromuoa bo tla tsoelapele ho ea ho batho ba lahlehileng le ba ahlotsoeng, moo ba ke keng ba fumaneloa mohau? Nahana ka eona, ho ka bathoeng haeba e ne e ka . . .

¹⁸³ U re, “Na ke eona, Moena Branham?” Ha ke tsebe. E ka ba morao ho feta kamoo re nahanang.

¹⁸⁴ Ha u bona seriti sa ntho efe, u tseba hore e tla ba eng ha e le sebele. Le ne le phahamisitse matsoho a lona, ‘me le bone menoana e mene, menoana e mehlano, seo letsoho la hao le tla ba sona ha neketiki e etsoa positifi, ke seo e leng sona seriting.

¹⁸⁵ Lumelang, metsoalle. Oh, Molimo a le thuse! Khele, ke makhetlo a makae . . . Le ntheketse lisutu tsa liaparo. Ke na le limpho, mabokose a lik’hendi, le liroto tsa sirapa, kantle hona joale. Le bile le file, lelapa la ka—la ka, lithaoele; bana ba ka, liaparo. Le mphepile. Le entse sohle seo le se khonneng. ‘Me joale e reng ke le etsetse ho hong. Ha re—ha re—ha re . . .

¹⁸⁶ Oh, hola Molimo o ka kena, ka mokhoa o itseng, hona joale! Ho lona ba ka holimo, mokatong o ka tlase, hohle moo le leng teng, seotloaneng, ha Molimo o sa tšehetse seo ke se buang, e tla

ba ke buile leshano. Empa haeba A e tšehetsa! Ke a tseba le bone boipeho bo bongata ba nama, empa seo se lokela ho bentša ntho ea ‘nete ho feta ho lona. E-bang le tumelo, ‘me le lumele.

¹⁸⁷ Ehlile, ha ho setlankana sa thapelo ka mohahong. Haeba se le teng, phahamisa letsoho la hao, mang ea tšoereng setlankana sa thapelo ho tsoa kopanong ena. Ua bona, ha ho le a mong. Empa mona ho lutse batho ba kulang. ‘Me haeba Moea o Halalelang, hantle mona kalaneng ena, o tla senola ‘me o tsamaee hara bamameli bana le ho potoloha mona ho fihla ho lona batho. . .

¹⁸⁸ Shebang seo Bibe e se buileng. Pontšo e kholohali ke efe? Ke Lentsoe le bonahatsoang mongoaheng o mong le o mong. Na ho joalo? Be, hobaneng ba sa khona ho lumela Jesu? Athe, Baheberu 4 e boletse, “Lentsoe la Molimo le bohale, le matla ho feta sabole e leolitsoeng ka nqa tse peli, le a hlaba.” Ke mohla Le reroang ka matla a Lona, Le hlaba ho le letona le ho le letšehali, ho hlaba nqa tse peli. Ke eng? “Le hlaba ho isa mokong oa lesapo.” ‘Me le etsa’ng hape? “Le senola mehopolo e ka pelong.”

¹⁸⁹ Jesu o ne a eme mono, ‘me boporofeta ba Hae bo hlaba batho bao ba borapeli likotoana, le ho ba bitsa “sehlopha sa matemona,” holima batho; le ho llela tšoarelo ea bona ha ba ne ba Mo thakhisa.

¹⁹⁰ Joaloka ha Moena Jack a kile a bua, a etsa tlhahiso, “Bana ba Hae ka Sebele ba tsetselela Mali a Hae.” Ke hantle.

¹⁹¹ O ne a leka ho ba pholosa lihelong tsa liabolosi. ‘Me eitse ha ba bona temoho eo ea moea e tsoelapele, hobaneng ba sa tseba, ba tseba hoba eo e ne e le pontšo e kholohali ea Molimo? Ka lona lebaka leo kereke ha e tsebe kajeno. Empa hohle moo Leseli leo le chabelang peō eo e reriloeng pele, e tla tsoetsoa Bophelong. E, ruri, u ke ke ua e thibela.

¹⁹² Letsatsi le mahlhana a lona holimo mono, l-e-t-s-a-t-s-i, le laola bophelo bohle ba limela. Peō ha e robetse mono ‘me letsatsi leo le e otlala, e tla phela. E, monghali.

¹⁹³ ‘Me M-o-r-a Molimo ke ‘musi oa Bophelo Bosafeleng bohle. ‘Me ha peo ea Bophelo e lutse ka ho uena, moena, ha M-o-r-a eo a otlala mono ‘me a u bontša seo A leng sona, e tla Bophelong. Ha ho mokhoa oa ho e thibela eona.

¹⁹⁴ U lumele joale. Lumela feela. E ba le tumelo ho Molimo re sa rapela ka hlomphe.

¹⁹⁵ Ntate ea Maholimong, mona ho robetse pela ka sehlopha sa masela, lisakatuku. Oho Molimo, bohle ba U lumela o le mofolisi. Ehlile. Batho bohle ba Evangeli e tletseng ba U lumela ka tsela eo. U mofolisi, ‘me U mosa haholo ‘me U mohau ho bona. Hantle lihoreng tsa thakhiso ea Hao, U bile oa folisa, ho busetsa e—e tsebe ea molaoli oa lekhola oa Moroma, eo Simone a e khaotseng ka sabole ea hae. Sera se tšileng ho U lata, U ne u le mosa ‘me u le mohau ho folisa. U sa ntse u etsa ntho e tšoanang.

¹⁹⁶ Empa, Morena, na mahlo a batho a ka tutuboloha ‘me ba bona seo re lehang ho ba bolella sona, hore ke—ke nako ea qetelo! Ke a rapela, Molimo, ke rapela ka Lebitso la Jesu, e ke e etsahale bosiung bona, Morena. Tabernakele ea Bophelo e inkele lebitso la eona bosiung bona, Bophelo, Bophelo Bosafeleng. Sehlopha sohle se tlasa lifolaga tsa eona mona bosiung bona, Bophelo bo ke bo fihle, bo khaphatseha.

¹⁹⁷ Ka mora hoba Lentsoe le beoe mona, ka ho hlaka feela kamoo Le ka khonang, tšepiso ea letsatsi, U E tšepisitse letsatsing lena. Re elelloa seo, Morena.

¹⁹⁸ ‘Me re bana ba Abrahamama, re nyolohile, joalo ka Abrahamama. Ho tloha ho tšela; maipolelo. Ho tla naheng esele; re entse joalo, re fumane lipono le litšenolo, le ntho eohle, tsa Molimo. Kamoo A buileng le rona le ho re folisa, le ho etsa tsona lintho tseo A li entseng ho Abrahamama! Empa nakong eo ea qetelo, pejana feela ho Mora oa tšepiso, eaba Molimo o bontša seo nako ea qetelo e tla ba sona, ka pontšo e kholohali.

¹⁹⁹ ‘Me hape Peō e kholohali, Jesu Krete, Peō ea tumelo, e a theoha le ho etsa ntho e tsoanang pheletsong ea Bajuda, joaloka ha ba entse mono pheletsong eo.

²⁰⁰ ‘Me joale qetellong ea lintho tsohle, O tšepisitse ho khutla hape. “Joaloka matsatsing a Nohe, le matsatsing a Sodoma.” “Mesebetsi eo Ke e etsang, le lōna le tla e etsa.” Haeba Bophelo ba Hae bo le ka ho rona, Bo halimisa Eēna. Bo halimisa moetsi, mothei oa sehlahisoa; Mosebetsi oa hae o mo halimisa kamehla, eēna. ‘Me Molimo o ne o halimisitsoe ka ho Krete, “Ha le sa lumele ho ‘Na, le lumele mesebetsi.”

²⁰¹ ‘Me joale ke a rapela, Molimo, hore U tle u folise e mong le e mong oa bana bao ke ba rapellang ka botšepahi. Ba folise, Morena. Aba sena.

²⁰² ‘Me joale, Ntate ea ratehang oa Leholimō, ke ‘na enoa ke eme. Ke a elelloa nke—nke ke ka hlola ke eba mona halelele, ‘me ke bona bophelo ba ka ba tlhaho bo pona. Thusa, bosiung bona, Morena, khetlo le le leng lena. Hang hape, Morena, abela hore—hore batho ba le bale tse fetileng joale, le ho hahamalla pheo ea pitso e holimo. Aba sena, Morena.

²⁰³ Ke tla U kopa ho etsa ntho e tlang ho ba thata, Ntate. Ke elelloa seo. Empa ke tla U kopa ho lumella Jesu ho kena ka ho rona. ‘Me, Ntate, ho ntlotsa feela, ho phutheho ena ho ke ke ha thusa hakaalo U sa ba tlotse, le bona. Re—re ntho e le ‘ngoe, ‘moho. Le ho ba tlotse ka tumelo, hore motho e mong mona. . . Ruri motho e mong o na le tumelo e lekaneng ho etsa hoo, joalo ka mosali eo ea amileng seaparo sa Hae. “‘Me hona joale Ke Moprasta e Moholo ea ka angoang ke maikutlo a mahlomola a rōna,” ho bontša hore E sa le pontšo eo e kholohali, Molimo ka ho motho, Molimo o sebetsa ka motho, e leng ea sa tsebeng ho bala le ho ngola le ba itatolang, le ho lumella Moea ho sebetsa

ka bona feela. Ho na le basali ba banyenyane ba lutseng ka mona, ba mahlomoleng, mohlomong, ka eona ntho eo mosali eo a neng a ena le eona. Ho na le bo-Simone ba lutse mona bosiueng bona, Morena, e leng—e leng bara ba bo-Jonase, joaloka ha ho etsahetse. Ba lutse mona. Thusa joale, Morena, batho ba tle ba tsebe.

204 ‘Me araba thapelo ea ka ke sa...E seng ka maikutlo; ke a tseba hore ke tsielehile maikutlong, empa ke...ke ferekane, Morena, ha ke bona lintho li tsamaea kamoo li etsang. E—e nkhatatsa ho re...Batho ba khutlele Lentsoeng, ‘me ba lebale lintho tsena tsohle tse hlolang tsa hora, mehopolo e tummeng ea lefatše; ho khutlela Lentsoeng, Lentsoe le bonahalitsoeng horeng eo re phelang ho eona joale. Aba sena, Morena.

205 ‘Me re sa inamisitse lihlooho tsa rōna, ke batla e mong le e mong oa lōna a rapele, feela—feela. Le se ke...Lulang le inamisitse lihlooho tsa lōna le rapele feela, ho re, “Morena, nthuse joale.”

206 ‘Me u boloke kelellong ea hau seo u batlang ho se rapella. ‘Me haeba Morena Jesu a ntse a phela, le joale ruri, metsoalle, eo e tla ba pontšo e kholohali. ‘Me batho ba bang ba itse, “Oh, ha ho pelaelo hoo ho ka etsoa, Moena Branham o na le neo e khōlō ea Morena. ‘Me ke a lumela, haeba a le tlasa tlolo, ke moporofeta oa Morena, empa u se ke ua mamela Thuto ea hae.” Joale mang ea ka etsang joalo, a ka bua joalo, a nto nkoa e le moithuti? Athe, ke eona pontšo e tlalehang Thuto e nepahetse, ho latela Biblele.

207 ‘Me ha u le moetsalibe, letša le letile mono. Haeba u eso kolobetsoe ka Lebitso la Morena oa rōna Jesu Kreste, tsoarelong ea libe tsa hao, letša le letile. Haeba u eso amohele Moea o Halalelang le joale, u tsoanela ho fuoa pontšo eo ea Letšoao holim’a hao ho seng joalo u ke ke ua kena Khorong. U tsoanela ho rua Bophelo ba Kreste ka ho uena.

208 Joale le rapele ‘me le kope Molimo ho le thusa, re sa rapela joale. ‘Me likhaitseli mono e—e liletsa, “Lumela Feela.”

209 Ak‘u nahane, Jesu o theoha leralleng. Mohopolong oa hao oa boinahanelo feela, ho ‘Mona a tla a kena monyako, le ho theohela mona le ho ema sefaleng mona, le ho re, “Bana.” E nahaneng kelellong ea lōna joale.

210 ‘Me e mong le e mong a apare tšabo ea ‘nete, ‘me le khutse le rapele. Hohle, lulang le rapela feela, ho re, “Morena Jesu, nkhouhele. Morena, ke a lumela.”

211 Ntate Molimo, ba khutsitse joale. Motsotsong o mahlonoko ona, ke lumela U le teng mona. Ke lumela seo, Topallo e kholo eo ea Mollo e tsamaisitseng Iseraele lefeelleng, e ileng ea bonahatsoa nameng. O itse O na le teng. “Pele ho Abrahama, KE TENG. Ke tsoa ho Molimo, ‘me Ke ea ho Molimo.”

²¹² Kamora lefu la Hae, kepelo, tsoho, le nyolohelo; Pauluse o kopane le Eèna tseleng, a theohela Damaseka. Leseli le leholo la mo otlala mo lihela fatše. Moheberu eo a ka be a sa Mo bitsa “Morena” haeba a sa tseba hoba eo e ne e le eona Topallo ea Mollo. “U Mang, Morena?”

A re, “Ke ‘na Jesu.”

²¹³ ‘Me ke Uena enoa bosiuong bona, le rōna, Bophelo bo tšoanang ka ho rōna. Ke U leboha ka Bona, Ntate. Joale ho ke ho tsebjoie hore ke boletse ‘Nete. ‘Me eona . . . Moroetsana eo ea emolang, ho kopanya motho le Molimo ‘moho, ke eona pontšo e hara rona bosiuong bona qetellong ea mongoaha, pontšo e kholohali. E ke e etsahale hang hape, Ntate. Ke rapela ka Lebitso la Jesu Krete.

Joale lulang le rapela feela.

²¹⁴ Joale ke beha moea o mong le o mong ka mona tlas’a taolo ea ka, ka Lebitso la Jesu Krete. Joale ha u batla ho rapela, tsoelapele u rapele; ha u batla ho lelala, etsa seo u se batlang joale. Lula u tsoere bopaki ba hau. Tsoelapele ho tsoara tumelo ea hao, haeba u rapela.

²¹⁵ Kea bona, ka pela ka joale, moleng ona o hare oa litulo mona, mofumahali e monyenyanane, mosali, ea lutseng hantle morao mona, ea hlahisang feela hlooho ea hae; mona phachising e bohareng, hole nqa morao. O jeoa ke mokokotlo. E. U a lumela Molimo o tla folisa mokokotlo oa hao? U etsa joalo? Ho lokile. Ke seo u neng u se rapella. Na ho joalo? Phahamisa letsoho la hau. Bobeli ba lona le folile. Mofumahali ea pel’a hae o ne a tsoeroe ke mokokotlo, le eena, ehlile o ile a phahamisa letsoho la hae. Ka e bona e tsoa ho eena ho ea ho eena. Joale, ha ke u tsebe, na ke etsa joalo, ha ho le a mong oa lona? Empa ke sona se neng se lokile. Haeba e le ‘nete, phahamisa letsoho la hau.

Joale na eo ke pontšo e kholohali?

²¹⁶ Mona, hantle morao lipakeng tsa litulo *tsena*, ho ea ka . . . ka lehlakoreng *lena* hantle morao ka morao, mosali e monyenyanane ea sa khoneng ho koenya, ho hang. Ho na le ntho e phoso ka eèna—ka eèna—‘metso oa hae. O batla a sa khone ho koenya. Empa o a lumela. O tsoa kantle ho motse. Na u tla lumela, khaitseli, hore u tla koenya? Na u tla amohela pholiso ea hau? Phahamisa letsoho la hao ha u rata . . . Ho lokile, joale u ka folisoa. Joale, haeba seo, haeba ke le osele ho uena, tsokotsa letsoho la hau *joalo*. Ke hantle, le a bona. Empa, ke eona taba, o ne a lutse mono hona mono a leka ho koenya. Joale, koenya joale ‘me u ka koenya hantle. Bona haeba e lokile.

²¹⁷ Na le a lumela Lengeloi la Morena le teng mona? Na le lumela seo, pontšo e kholohali? Batho bao, hohle ka mohahong. Motho e mong holimo mona, ea haufi. Ke tla furalla, ho le tsebisa feela, ka papiso e ‘ngoe le e ‘ngoe, hore Ke Morena Jesu. Ke tla furalla. ‘Me motho e mong a rapele, lumela. Haeba u nahana hore ke u

shebile, ho rata ho bala kelello ea hau, kapa ho hong, u lumele feela. Hola A ka bolela seo Sara a neng a se rapella, kapa seo a neng a se etsa ka tenteng ka mora Hae, hoba Molimo o bonahetse nameng ea motho, motho ea jang, a noa, pontšo! Ke le boleletse hoba e ne e le pontšo e kholohali.

²¹⁸ E, monna ke enoa o tla ka pel'a ka joale. O eme hantle ka mor'a ka. O hantle morao *mona*. O a fofala. Lebitso la hae ke Maclusky. Ha a ka lumela ka pelō eohle ea hae, Molimo o tla mo folisa. Ema. Ha ke eso bone monna eo bophelong ba ka. Lumela, monghali.

²¹⁹ Ho ka thoeng ka nqa *ena*, na u tla lumela ka mona? U lumela ka pelō eohle ea hao? U rapele.

²²⁰ Ke bona mosali, 'me o tšoenngo ke ho hong. O hopola e le sethoathoa, hobane o a ilibana. O tsoa Leboeabochabela, ho tsoa . . . O tsoa Florida. 'Me lebitso la hae ke Mof. Kinney. Ha u ka lumela, Mof. Kinney, le ho ema ka maoto a hau, u tla folisoa lihlaselong tseo tsa ho ilibana. Ema ka maoto a hau. Ha ke eso bone mosali eo bophelong ba ka. Ke molata ka botlalo. Mo botse.

²²¹ Na le a lumela Ke pontšo e kholohali? Ho ka thoeng ka lephakong *lee*, na le a lumela?

²²² Mosali ea mahlomoleng, a batla a khahlotsoe ke methapo, hantle ka nqa *ena*. Lebitso la hae ke Mof. Jones. Ha a ka lumela ka pelō eohle ea hae, a ka folisoa. Mof. Jones, ha u ka lumela, ua ema ka maoto a hao ua lumela hobane Jesu Krete o a u phekola, u ka fumana pholiso ea hao. Eèna, ke molata ka botlalo ho 'na, ha ke eso 'mone bophelong ba ka. Molimo o a tseba hoo ke 'nete.

²²³ "Moroetsana o tla emola a tsoale Mora, 'me Lebitso la Hae o tla bitsoa *Emmanuele*, etsoe ka phetolelo ke, 'Molimo o na le rōna,'" Molimo ka ho rōna mona, pontšo e kholohali ea Molimo!

²²⁴ Le a e lumela na? Be, re nakong ea qetelo. Haeba A le teng mona, hobaneng u sa Mo amohele joale? Na le bona se tlamehang ho etsahala? Na le bona se tlamehang ho etsahala? Motho e mong le e mong hona joale o tlameha ho folisoa ka botlalo. Ho na le Motho, ho na le Ntho e teng mona ho etsa seo. Motho e mong le e mong o tseba seo.

²²⁵ Molimo Leholimong o a tseba ha ke tsebe le a mong oa batho bana. Ke—ke basele ka botlalo. Ba botseng le bone. Ha ke tsebe letho ka bona. Ha ke ba tsebe, moo ba tsoang teng, kapa letho.

²²⁶ Empa ha u ka nka lentsoe la ka ka eona, haeba e le 'nete, ke tla re hona joale, ho uena, Moea o Halalelang o likoloha tulong ena. Leseli leo le mona hohle. Joale haeba Lentsoe le nepahetse, 'me Lentsoe le bonahatsoa ka pel'a hau, molato ke ofe ha re sa E amohele? Ntho e latelang ke efe, moena?

²²⁷ U mathateng, le uena, ntho e mabapi le, khele, ke mohatsau. Ke hantle. Motsotso feela hofihlela ke bona seo e leng sona. U se u ipoletse, e tlhelle e le joalo.

Ke le phepetsa ho lumela Molimo hona joale, pontšo e kholohali!

²²⁸ Ntho feela eo ke e tsebang ka moshanyana eo, ke ile ka tsukutla matsoho a hae. Nke ke ka u bolella lebitso la hae hona joale. Empa ke sona se phoso hantle. Ha ke tsebe seo. Ke ne ke le teng mohla a chatang, empa ntho e 'ngoe e etsahetse. Ha ke batle ho e bolela mona.

²²⁹ Empa, ho lokile, na ha le lumele Molimo? O itse pontšo e kholohali ena e tla etsahala. Ke ba bakae ba batlang ho Mo bona? A re boneng letsoho la hao, ho re, “Nna, ke tla Mo lumela.” Amen. Mokatong o ka tlase, hohle moo u leng teng, holimo seotloaneng, hopola pontšo e kholohali ea Molimo, Lentsoe la tšepiso, le bonahatsoa hantle mona kajeno ka pel’a lōna, letsatsing lena.

²³⁰ Jesu o balile Mangolo, ‘me a retoloha a re, “Kajeno lena boporofeta bona bo etsahetse har’a lōna.”

²³¹ Ke re, ka Lebitso la Jesu Krete, kajeno lena pontšo ea nako ea qetelo e bonahatsoa ka pela lona.

²³² Ba kulang ba bakae? Phahamisang matsoho a lōna. Ka Lebitso la Jesu Krete, ka pel’a Sefahleho sa Hae, ha u ka lumela seo u se boneng, e le ‘Nete e tsoang ho Molimo, ke u kopa ka Lebitso la Jesu Krete, ema ‘me u E amohele ke hona, ho re, “Ke tla E amohela. Ke tla etsa joalo, e tla batalatsa ho ‘na. Ke a lumela.” Ha ke tsotelle moo u leng teng. Ke botle. Phahamisang matsoho a lona joale. Joale rorisang Molimo feela. [Moena e mong o re, “Lisakatuku?”—Mohl.] (Ke se ke li rapeletse.)

²³³ Joale Mo roriseng feela, emang mono. Pontšo e kholohali, pontšo e kholohali hantle—hantle hara lona, pontšo e kholohali ea Molimo ea letsatsi la qetelo! Amen.

Molimo a u hlohonolofatse, moena. 

63-1129 Pontšo E Kholohali
Life Tabernacle
Shreveport, Louisiana U.S.A.

SOUTH SOTHO

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Krete. Buka ena e ke ke ea rekisoa, ea boela ea hlahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fua boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org